

于湖題襟集  
三











于湖題襟集

三

袁昶編錄



中華書局



# 于湖題襟集

## 文二

### 前漢匈奴表敍

沈惟賢

伊昔三代之隆。曷嘗無不若之類。竊窺於邊隅者乎。觀於格有苗而舞干羽。警獫狁而飭戎車。蓋大抵內脩其德政。而外忱以明威。其來也禦之。其往也備之。使夫詘節請和之誠。出自戎狄。而姑如其意以納之。斯百世之逸也。漢興積穀世之資。東拔濊貉。朝鮮。西建酒泉。敦煌。北築河南。新秦。至於渙汗之頒。遠及西域。呼韓稽顙。來朝甘泉。雖殷伐鬼方。周朝肅慎。武功之盛。未或前聞。然而二百一十年中。攄謨帷幄之士。與鷹揚朔漠之將。其議和親征伐。言人人殊。要歸視世主之所嚮而已。故高惠議和。則良平之謀。絳灌之武。束手而無所試。至於孝武之世。雖董仲舒汲黯徐樂嚴安主父偃之屬。人進休養之謀。而開邊卒未已也。賈生有言。匈奴之衆。不過漢一大縣。以高帝之威。懲平城之失。而急思和親。貽謀若此。無惑乎文景之不克振也。武帝單天下之力。以挑強胡。五十年間。匈奴罷極苦之。漢士馬物故十六七。議者以爲得下策。夫戎狄譬於豺狼。非文詞所能靡也。非禮義所能格也。規獲金幣。則撤跳梁之兵。漢使旣通。又南下而牧馬矣。彼諸夏之邦。有朝遣聘問之使。夕奏告急之章者。曾不能以好詞重貺。息蠶食之謀。而況於胡乎。是故若孝武之深入遠戍。爲子孫謀數世之逸。不可謂非中策也。秦始皇興數十萬之衆。北營長城。起臨洮。

屬之遼東。延袤萬餘里。令休息士馬。而得中主以善其後。亦萬世之利也。假使武帝降昆邪之後。繕完西北諸郡。謹斥堠。嚴烽燧。內修文景之政。以優吾民。華山桃林。無以尚之。帝之失在太初以還。貳師因杆。單財費衆。供無益之舉耳。逮夫宣元成哀之際。單于稱臣納質。身入朝者五。非德過於文景。而威加於高帝。蓋乘衆勝之勢。又因內訌之機。而后撫呼韓以眎恩。斬郅支以見威。故其和可久。然則中國之所以御戎狄者。必戰勝攻取。使議和在彼。乃可以還。不者。重邊郡之權。人自爲守。令犯塞者少利。則亦羈縻漸致和親之術也。竊攬漢于匈奴經營數世。而紀傳參錯。于終始懵焉。故爲斟酌史漢。參以羣籍。掇拾大指。述之如左。

後漢匈奴表敘

惟天亭毒。諸胡以亂函夏。而置之不毛之地。麇集鳥散。與漢殊域。所以界中外。並育而不相害之意也。自漢竟甯之世。單于敏闕。願保塞上谷以西。至燉煌。傳之無窮。請罷邊備塞。以休吏民。天子優詔弗許。及遭新莽之篡。坤輿旣攘。而胡馬不聞越朔。易而南。何者。漠北之垂。去塞寫遠。囊籛深涉。則難爲繼。河西四郡。或推刃於其後。雖因盧芳之資。弗克逞也。東都旣建。匈奴析而爲二。南部之扶服。不亞於呼韓。車騎金吾。星馳電擊之威。不減於衛霍。北虜創艾。流離右方。過於郅支之入康居也。然而袁安噫鳴於前。范生悼歎於後。其故何哉。夫日逐之來。漢臣妾畜之。將擁歸北庭。非蛾伏塞下而已。洎乎四校橫徂。卻塞五千餘里。不以此時分遣歸國。長爲外藩。而使烏桓鮮卑分裂北土。其誤一也。昔人嘗開邊之失。曰得其地不可耕。

也得其民不能治也。今棄西河饒沃之產。以畀匈奴。毆中國之民。爲之築亭堡。制烽燧。平王戊申。詩人有揚水之歎。迺以從事於胡。其誤二也。當孝武時。驍騎四出。民力單耗。猶開河南之野。建朔方之郡。今供給南單于。歲費一億九千餘萬。不增尺寸之壤。而糜少府之財。填虛山之壑。其誤三也。戎狄之性。熾動惡佚。久倨列郡。稔悉疆域。一旦鳴鏑揚塵。馳逐於內地。非手足之蚡搔。而胸背之標疽也。而當世不察。猶欲並啓北庭。南面而臨之。以揚武烈。其誤四也。夫昔歲呼韓保塞。俄而北歸。朝廷不以爲恥。自單于比入居美稷之後。漢所以翊庇之者。可謂勲矣。然而狼心不悛。旋踵蠱叛。論者徒見晉武之興。不因平吳之力。毆逐五部。橫使神州陸沈。海內鼎沸。夫禍之胎也。非朝夕之故矣。是以聖王嚴內外之防。閉關塞。明禁約。備而不征。疏而不戚。斯夷夏交輯之道也。以綴讀前記。舉建武之元。訖孝獻之末。征攘安撫之迹。略著於篇。

### 晉五胡表敘

繫夫金行失御。戎桀倭僭。地六汴宋。而禍酷於徽欽。歷過亡秦。而亂鍾於二世。讀史至此。跼乎傷之矣。夫燎原之燄。起於纖介。大河之流。始於濫觴。當樓船南下。蕩平吳會之日。正五部都尉僑居汾澗之際。晉葉燕雲而貽靖康之禍。漢立南部而致永嘉之亂。咎歸前人。非典午也。抑干寶有言。晉之興也。其植基固本。與前代異矣。假使主無駸懦之君。內無昏楮之后。維城之重。不尋於干戈。搢紳之流。不溺於清淨。宮府戮力。繕完金湯。彼劉石負凶獷之質。猶恐其跳梁一隅。若盧芳入高柳。裴宙窺浙東。晉之君臣。未得安枕也。而以昏德臨之。枝葉未彫。本質先撥。國無人焉。則啓戎心。固然其何足怪。夫國之將亡。蓋亦有深識遠見。

之士燭之於未形。觀郭欽獻策於太康之初。江統著論於元康之末。彼曷嘗不曉音瘖口。爲未雨計哉。唐太宗平突厥。寘降戶於河南。魏徵以爲數年之後。蕃息倍多。必爲腹心之患。居無幾何。舉族謀叛。突犯行宮。夫其發之也疾。故爲禍也淺。若晉之五胡。其膠固蟠結於西北諸郡。幾百餘年矣。而夥涉沈沈。曾不覺察。遂使伊洛故墟。淪於氐秦之域。關隴王氣。化爲豕突之場。豈天地之不仁。亦人事之闕也。建興初。愍帝卽位於長安。詔丞相睿以時進軍。睿初無北伐意。劉琨區區謀復王室。容膺封陝之任。乃偷息於江東。比之建炎議和。罪又甚焉。君子是以知晉之不復西也。夫戎狄叛亂。固其天性。驅之漠北。厲階斯絕。故爲表舉大分。以著龜鑑。亦以補史氏之闕。

釋薩里河

聖武親征錄。上麾下擲只塔兒馬刺別居薩里河。何秋濤曰。疑卽今和博克薩里河也。賈按。西域釋地。賽里山在塔爾巴哈臺城東八百餘里。山之陽名和博克薩里。新疆識略。謂之霍博克賽里。會典圖。和博克河出烏里雅蘇圖喀倫之南。薩里山西南流折東南流。入北路土爾扈特三旗界。卽何氏所謂和博克薩里河矣。考此河在科布多西南。去太祖所居幹難河數千里。是時東起土謝圖汗。西至科布多。皆克烈部汪罕地。不應越人之國來隸麾下也。竊疑薩里河乃明撒里怯兒。金幼孜北征錄曰。雙泉海卽撒里怯兒。元太祖發迹之所。舊嘗建宮殿及郊壇。每歲於此度夏。山川環繞。中間數十里。前有二海子。西北山有三關口。通飲馬河。土刺河云云。明史永樂十二年。北征瓦剌。五月。次飲馬河。六月。次雙泉海。與瓦剌戰敗之。

追至土刺河。元史本紀太祖二十二年七月崩於薩里川哈刺圖行宮。與北征錄舊建宮殿之說合。崩以七月。知於此度夏也。其後札木合以兵來戰。帝駐軍答闐版朱思之野。爲今克魯倫河。卽明之飲馬河。然則薩里河在今克魯倫土拉兩河間無疑也。又按祕史卷四作撒阿里地面。撒阿里乃薩里一音之轉。益知其爲撒里怯兒矣。

元聖武親征錄跋

江陰繆荃孫小冊

右皇元聖武親征錄無卷數。光澤何先生願船取舊鈔本校以金元二史元祕史及金元人傳記文集。考形訂聲。經年緯月。削其重複。更其舛亂。補其奪字。刪其衍文。張丈石州推其廓清之功。比於武事。誠非虛語。然亦尙有未盡者。如是時別里古台那顏掌上乞列思事。親搖上馬。何云搖字疑誤。荃孫按搖疑是控字。大太子朮赤。二太子察合台。三太子窩台。太宗也。荃孫按太宗也三字。是注誤入正文。詔史天倪南征取平州。木華黎遣大進道攻廣甯府。降之。張丈校云。本紀作賜進道。荃孫按大進道爲史進道之訛。賜進道則音近而誤。進道秉直之弟。天倪之從父。從木華黎攻廣甯府。爲見進道神道碑。七月。上遣唐慶使金保降。荃孫按保降是催降之誤。觀下文遣人入城催降可見。乙亥金右副元帥七斤以通州降。木華黎攻北京。金元帥寅花麼等以城降。金御史中丞李英帥師援中都。戰於霸州。敗之。三事皆與下文復。荃孫案下文卽云金主以檢點慶壽元帥李英運糧分道還救中都。齎糧人三斗。英自負以勵衆。慶壽至涿州旋風寨。李英至霸州青戈。皆爲我軍所獲。與金李英傳元本紀合。又云時金通州元帥七斤率衆降。惟帳復

張鑑柄衆哥也。思元帥據守信安。何校云未詳。荃孫按帳復是張甫之譌。張鑑柄是張進之譌。衆哥也。思是衆家奴之譌。金九公傳。張甫張進衆家奴據守信安不下。正在是時。下又云金元帥那答忽監軍斜烈以北京來降。何校云北京疑有誤。荃孫按寅花廳。元太祖紀作寅古答論虎。卽那答忽也。願船不知三句爲衍文。而強爲之說。所以愈疑愈誤也。

刻黑龍江外記跋

桐城蕭穆敬孚

右黑龍江外記八卷。鄂文端之曾孫西清所撰。向無刊本。此冊黃先生彭年借得。何比部秋濤鈔本錄副。重黎權巡復向黃先生借鈔。今以授予屬校刻之。重黎言。旣稱外記。必有黑龍江志。而特拾其餘藩耳。然多方觀正志不可得。且如墨爾根布特哈以西。外興安嶺山路。可通奇乾河墨河金廠。較之取道愛琿新城。遡江西上之水路爲徑捷。再迤西踰額爾古納河。接粗魯海圖之地。直接外蒙古喀爾喀車臣汗之東界。亦產金沙。此一帶山脈。國語謂之金阿林。南懷仁艾儒略地圖。謂之東西金山。又江左岸之愛琿河。精奇里河。雅克薩城。地勢遼闊。五體界碑。亦在境內。是記中皆不詳。蓋西清亦非能身到目驗其地也。惟列城台站。天時物產。亦可藉此記考見大略耳。重黎之言如此。又書眉有重黎隨手批識語。今皆散隸文句之下。爲夾行小注。刻成略記數語。以志緣起。又屬校薩英額道光中所撰吉林外記。亦向無刊本。今尙未竣工。光緒甲午十有一月長至日。桐城蕭穆時病新起。書于海上廣方言館。

吉林外記跋

蕭穆



甲午夏。復訪重黎兵備於鳩江。時兵備欲流傳古籍及近人經世實用之書十數種。先以嘉慶間長白西清研齋所撰黑龍江外記八卷。屬爲校刊。是年冬完工。復以道光初吉林堂主事滿洲薩英額吉夫所撰吉林外記相授。與研齋之書相輔而行。其書十卷。分門別類。均有條理。自序有云。事必徵實。言皆有據。實能副之。特其足跡未能全境周到。所記亦不無疏略。與研齋之書亦約略相等。重黎云。研齋之書第二卷述城堡有云。石晉末。胡嶠陷遼。爲蕭翰掌書記。居福州。宋徽欽二宗入金。居五國城。以地理考之。福州五國城。應在今黑龍江城境內。余於光緒初傳鈔此書。卽知此說之謬。比疑此城近會甯府。當在吉林烏喇甯古塔之間。終以茫無實據。不能確指爲今之何地。彼時漫注數語。聊以存疑。後乃知乾隆間。有副都統綽克託築吉林伯都訥城。得紫檀匣。中藏宋徽宗畫鷹一軸。墨蹟如新。並得古銅瓷器多端。又有碑碣。錄徽宗晚年日記。於天會十三年寄跡於此。曾經數載。考宋史徽欽二宗入金。初徙韓州。後移冷山。皆不出今吉林內地。終徙五國城。故址卽今伯都訥城。乾嘉間老輩考求地理。頗有知之者。而汲修主人曾載諸嘯亭雜錄。潁川逸士亦載諸東省記聞。雖互有詳略。而證據無殊。今吉夫之書第二卷記阿勒楚哈城。城南二里有金顯祖建都故城。俗稱白城。有謂爲五國城者。誤。第九卷古蹟三姓條。五國部下。據遼史營衛部族志。考得五國頭城之名。亦爲詳核。蓋五國城古名五國頭城。亦曰五國城頭。當時並設節度使領之。又吉夫於五國部下。徵引宋金諸史及元明一統志。洪忠宣松漠紀聞。并近代高士奇扈從錄等書。參考五國頭城故址所在。均未有合。且云自其高祖由京陞吉林正黃旗佐領。至今五世爲吉林人。留心考查。

無此城基。又曰：考論古今五國城在三姓無疑。松漠紀聞扈從錄里數地名，傳聞互異，不足爲證。姑論此以俟。後之博覽君子，蓋吉夫著此書時，汲修主人及潁川逸士之書，尙未行世，雖能辨阿勒楚哈城南二里白城，謂爲五國頭城之誤，而又以爲在三姓無疑。終曰：俟後之博覽君子，亦尙不失古人著書慎重之體。余前以研齋之書，屬爲校刊，未及將此段公案詳注於彼書城堡所論五國城條下。今吉夫之書，亦不能自明。子其詳書，以彌兩書之疏漏可也。重黎所述如是，穆以吉夫之著此書，上距乾隆開綽克託築伯都訥城時，上下不過五、六十年，當時故老或有見而知之者，或有聞而知之者，何至如其所云，自其高祖至今五世爲吉林人，留心考查，無此城基，而竟一無所聞邪？由此類推，吉林全省故事，當詳而不能詳，當載而不及載，且不知凡幾矣。惟東三省之地，除盛京通志外，記載寥寥，賴有研齋吉夫之書，講求輿地之學，有備經世實用者，不能不深有所取焉。此則重黎校刊兩書之微指也夫。

考前明倭事本末

常州廬生殷葆誠

日本古倭奴也。隋開皇末，始通中國。唐咸亨初，改名爲日本。趙宋以前，朝貢不絕。元世屢招未至，迨明太祖有天下，而方張餘黨亡命海上，往往糾其島人行掠山東沿海州縣。此入寇之始也。嗣後山東浙江福建瀕海之區，靡歲不擾。遣使責讓，始聽終違。胡惟庸誅，復悉其使林賢交通及詐貢謀逆事，計雖不行，而帝怒日本特甚，決意與絕。嚴飭海防，倭警漸稀，未嘗非善策也。成祖卽位，遣使諭貢，且弛其私攜兵器之禁，故自永樂以迄宣德，縱未大舉入寇，而海疆亦時時被掠。正統四年，倭以四十艘連破台州甯波昌國。

等所衛。大肆殺掠。景泰以後。或時載其方物兵器。出沒海濱。無備則寇。有備則貢。復又勾引姦民。爲之嚮導。東南各郡。無數年無倭患者矣。嘉靖三十二年。汪直勾諸倭入犯。連艦數百。蔽海而來。自是浙東西江南北。悉遭蹂躪。幸張經曹邦輔各軍協力進勦。得以捷聞。而趙文華忌功妄舉。遂又有輒橋之敗。倭勢甚張。遠近震動。後徵俞大猷戚繼光劉顯諸將。合兵擊破。斬殺頗多。隆慶萬歷間。或寇閩浙。或犯廣東。惟時海防整飭。尙無大失耳。萬歷二十年。其關白平秀吉。遣將陷朝鮮之金山。乘勝長驅。走其國主。中朝遣祖承訓援之。敗於平壤。繼命宋應昌李如松進討。始退其師。並復朝鮮所失四道地。窮追復敗。而封貢之議起矣。秀吉死。諸倭盡歸。東南稍有安枕之日。然未幾而流寇難作。明社亦移。蓋倭之爲患。實與有明一代相終始云。

### 樊山集敍

仁和譚廷獻仲修

譚生內交樊子。在甲戌之夏。公車被放。道義相期。獻遂以是年作吏皖山。君閱歲成進士。入翰林。尋改官八秦。曠書問且十年。比予謝病歸南。皮張公開府三楚。聘主講席。雲門方居憂幕府。然後合并于黃鵠山下。琴歌酒賦。物外周旋。文字而外。道義企待。視疇昔加親。共昕夕忘羈旅。唱予和汝。而文字涂軌。如何涉如埴。泥焉。又一年。君出服官。別于海濱。黯然揮手雲月之下。則四三年。乃讀樊山集二十卷。昔者相知定文。往往如吾意所欲出。夫有韻之文。詩爲大宗。性情之理。成之於天。而措注在人。山川之助。資之在外。而陶洗於內。君少負奇秉。幽憶發之高秀。燕雲之驅車。巴蜀之橐筆。其振奇也夙。訪古則納二千載雲物。

於吾胷文章之正變在是。海國宏覽。北津沾。南粵嶠。浩淼乎無涯涘。及今游宦。秦隴峻雄。涇渭清濁。風土之敦厚。民物之繁盛。三代兩漢之陳蹟。與書策求其離合。卽與政教證其設施。於是詩不徒作。將傲故人。以所不能。不懈而古。然而吾雲門未嘗以充厲自喜。博大以張之也。未必不變其風力。益茹吐其聲音。至於幽憶之本於性情。高秀發自山川。有日上也。無相離也。則夫風雅詩人。多出于婉。九變復貫。知言之選。君其人與。會稽李莚客。先時以樊山詩與桐廬袁重黎並論。若以爲有雙美而無兩傷。獻游於二奇閒。恆歎袁有道氣。君有古懷。當相眎而莫逆。旣序樊山詩。不日有以論漸江鄉人詩矣。樊山填詞。與詩同原。而幽憶尤深。琴曲一終。弦外洋洋。流水之音。鍾期遇之。

漸西村人詩序

譚廷獻

伊昔班孟堅志藝文。序道家曰。秉要執本。清虛以自守。而序詩賦。則曰。感物造端。材知深美。可與圖事。若是乎不相謀也。而賢人君子。繕性達情。素所蓄積。波瀾莫二。吾友重黎以之。重黎負奇秉少。丁喪亂。失其楹書。廬存屏守。則已讀而舉要矣。故相見淵湛而蓄敏銳之氣。同好傾倒。老成嘆異。君盡折節。博涉羣言。而折中於體行。冠而壯也。游於四方。秣陵江都。師友取益。所學大就。公車往來。山海納於衿袂。通知時事。鬱律未試。而發於詩歌。文筆矜重。其言淵乎不易測識也。通籍農曹。拔濯而選於譯署。曲折中外之竅。宏攬消息之鑰。匡論者迹。而持幹以虛。虛且徵之。徵之亦於其詩。淵乎其益深矣。獻與君別十五六年。乃得盡讀其詩。固推大於夙昔之所見。少壯之所造。然而秉要執本。清虛以自守。味乎其言。若游乎其道。感物

造端材知深美。可與圖事。則文如其人。則人如其文。波瀾莫二。殆非一人之私言也。與老友李蕤客侍御有道者也。嘗舉君詩與恩施樊雲門並偁。樊詩跌宕華於材者。幹於道。袁詩懿美。默存者道。而卷舒者才。獻去年信宿君蕪湖樞巡官齋。縱橫談藝。撰序未成。今者序雲門詩。意所感觸。乃爲漸西村人詩序。以告後之志藝文者。

無邪堂答問序

義烏朱一新鼎父

無邪堂者。南皮張孝達尙書督粵時。闢廣雅書院以課士。而因以名其堂者也。己丑孟冬。余自端溪移主斯院。院規先讀書而後考藝。重實行而屏華士。仿古專家之學。分經史理文四者。延四分校主之。而院長受其成焉。諸生入賦以日記冊。記質疑問難之語於其中。而院長以次答焉。顧迫於時日。諸生未及遍觀也。今年春。分校馬君貞榆。偕其弟子龍君。約遊西樵。三人者。舟中無事。縱談舊聞。連日夕不輟。語次遂及諸生學業。馬君謂余。盍作一書以導之。余感其言。而意以謂學之成就。視乎其時。非其時而語焉。莫之應也。若辨章學術。以端諸生之趨向。則不佞與有責焉。乃簡舊所爲答問之辭。輯其稍完整者。而益其所未備。釐爲五卷。庸示諸生。烏虬自羲軒以逮今茲。自東海放乎西海。理之本諸大同者。無弗同也。而其間道術分歧。蠡午旁出。人自以爲許鄭。家自以爲程朱。許鄭程朱之在聖門。誠未知其能相說以解否也。而世之爲許鄭程朱之學者。支別派分。壹若終古不可溝合。則未知許鄭程朱之學之果歧歟。抑未知爲其學者自歧之歟。而況東海西海之遙。又安知無歧之。又歧者歟。聖哲不作。孰從取正。後生小子。奚所適從。然

則余之爲是言也。擿埴索塗。其敢自信乎哉。已不自信。而欲見信於人。余戾滋大矣。雖然。吾聞古之君子。蘄至於道者。無他焉。反經而已矣。經之不正。而欲民之無邪。猶卻行而求步。弗可得也。若狂者。若狷者。皆載道之器。若漢學。若宋學。皆求道之資。分茅設範。旣已隘其耳目。而似是而非者。亂焉。好爲新異者。復亂焉。鹵莽滅裂以求之。則亦鹵莽滅裂以報之。當是時也。士而蘄至於聖人之道。蓋亦甚難。誠知其難。而不敢安於苟且。士之尙志所爲。異於凡民也。邪慝之作。作於士大夫之心。凡民蚩蚩庸足責焉。則夫明六經之恆言。返而求諸聖。凡共由之大道。抑亦志士所不容自己者也。余誠譾陋。無所藉以導諸生。顧念天下之大。碩彥之衆。豈無人焉。躬行心得。以漸復乎經。正民興之盛。俾無潰乎斯道之大閑。庶幾陽儒陰墨之風。無自而熾。余日望之。而獨余之私望也耶。於虜誦詩三百。蔽以一言。諸生登斯堂者。尙其顧名思義。而毋或替於歧趨。以自隘其量哉。

沈廉仲先生七十壽序

朱一新

成皇帝時有名臣曰嘉興沈侍郎。以正學倡導後進。余登朝晚。去侍郎之世蓋二十餘年矣。乃得其孫曰曾植。曾桐者。與遊數以道誼文章相剴切。其意思誠有異乎人。人而聞其季父廉仲先生。能傳侍郎家學。心儀焉而未獲見也。歲丁亥。一新至廣州。以後進禮謁先生。會先生養疴謝客。仍未獲見。而獨得侍郎遺書。爲先生所校治者。讀之簡嚴深至。然後知先生之學之正。夫果有所受之也。聖哲不作。道術分裂。承秦滅限於功利。高者局於訓詁名物制度。而以是號於衆曰。吾道在是。夫所謂訓詁名物制度者。漢儒承秦滅

學。左右采獲。六經之黠昧者。迺明。其爲學甚勤。爲功甚鉅。而於義理之精邃者。或遺之而未言。或言之而未盡。非不爲也。蓋不遑也。且夫經爲聖心。聖不虛作。大義易見。微言難知。漢儒於其易見者。以訓詁考證通之。於其難知者。不徒於訓詁考證求之。三家之治詩。伏生之治書。董生之治春秋。皆是物也。去聖久遠。大義日晦。人心日漓。於是有宋諸子者出。通之性命。以濬其源。約之誠敬。以端其本。返之躬行實踐。以祛其妄。驗之辭受。取予以觀其微。而其旨歸一準於卽物以窮其理。斯張皇高遠之說。旣無所託。以亂真。而所謂訓詁名物制度者。皆吾博文約禮之資。而無破碎大道之失。是故漢儒之學。其大者在通天人之故。至通天人之故。而訓詁名物且爲粗迹矣。宋儒之學。其大者在窮性命之微。至窮性命之微。而訓詁名物特其始基矣。凡皆以求聖人之微言也。迨其敝也。言天人者。或雜以惑緯。言性命者。或遁於空虛。要皆末師圖儒。自豐其部。學者方擯棄之不暇。而暇溝漢界宋云爾哉。先生自其少時。耳目之習見。習聞者。旣已至精極粹。復從錢衍石。羅石諸先輩遊。於訓詁名物制度之學。靡不涉其窠窠。而一歸命於有宋諸子。晚知連州。未幾以疾受代歸。弗竟其用。獨篋離事最久。離故利藪也。而先生貧如故。久之聲聞益著。卽事非其素屬者。大吏亦虛己落焉。先生將之以至誠。而貫以敬事之意。務使惠澤逮於人人。而已不尸其功。人或有饋遺者。雖少物必峻卻之。此在晚近爲難能。而先生則其末節也。道之難明也久矣。學士大夫矜言復古。其說愈精而愈瑣。至宋儒辨晰心性之旨。乃以其涉門戶也而疑之。然則論學必屏程朱。說經必宗許鄭。非門戶歟。夫非許鄭程朱之果歧。人自歧之也。聖清純儒。首推二陸。清獻尙已。道咸立言深博。蓋有



宋元儒者東萊仁山之風。非猶夫永嘉經制之學也。而近世之言實學者。必曰亭林顧氏。吾謂非惟不知許鄭程朱也。抑不知亭林實甚。亭林之言曰。博學於文。行己有恥。其於辭受取與之節。辨之至嚴。至慎。今舍其所嚴辨者。而第曰吾從事於博文云爾。可乎哉。且博文云者。如第曰瑣細考證而已。吾未知於亭林之旨。其果有合焉否耶。先生論學。不主陸王。與清獻同。而其學之淹貫。且斷斷於辭受取與之節也。如是其庶幾博而知恥者歟。抑亦善承其家學者歟。今年秋。先生年七十矣。於是吾鄉之宦粵者。咸願爲歌頌以壽先生。而督序於余。余謂壽言類涉於諛。非先生所樂受也。乃推本先生學術之正。爲一新私淑艾者。既以自考。亦藉是以質先生焉。

崇義祠碑

朱一新

同治二年春正月十日。浙江布政使蔣公益。禮。旣大殲賊於湯溪。越翼日。遂復金華。蓋至是陷賊三載矣。聚落爲墟。白骨載途。有勵存者。儼然餓夫。而吾鄉環境三十里。女安於室。農游於衛。殆如未經亂之初。其得不歸功於鄉勇之枝梧也。先是咸豐十一年四月。僞侍王李世賢以輕騎突陷金華。吾鄉聞警。團練自衛。六月。賊攻官餘嶺。其村人擊卻之。然部署未周也。明年夏。賊屢敗於衢州。自相攜貳。踞義烏。會陳榮故粵產聚諸粵賊於邑境。不受徵發。號曰花旗。花旗者。僞翼王石達開之部曲。令迅世賢寇金華者也。其別賊屯永康三十里阮者。日游騎過山抄掠。五月十一日。我村勇譟逐之。賊駭走。遂申約束。別火伍。嚴斥候。塹要隘。相持四十餘日。賊婁受創。至飢疲不能軍。而會是皆榮遣其假子率十三騎覘我師。我師乘勝并



殲之夜襲佛堂倍磊赤岸三賊營賊不虞我師之卒至也獸奔鼠竄罔敢喙息自是擊賊於荒山於雅墅街皆失利戰死者近百人然雅墅之戰鄉兵氣銳甚迭敗迭進旦及日稷未休賊多喪其精銳遂宵遁而西鄉亦先團勇殺賊婁獲勝閏八月三日合攻縣城諸號爲花旂者皆驚竄嚴州以去於是義烏遂無賊賊環邑屯亡慮十餘萬狡焉思逞然卒不得一當也初官軍大膊龍游湯溪間賊勢日蹙廣徵援兵十一月僞梯王練業坤自湖州僞戴王黃呈忠僞首王范汝增自紹興各以其黨赴急而懼吾鄉團擊其後思先發制之列營數十里以迫我倍磊村者當西南兩鄉之衝賊踞焉兩鄉約夜襲其營江水甚漲濟師失期先登者陷伏中賊遂分道突入我師設覆以待倉卒不得發會天大霧賊遽走其自北道來侵者十六日集諸村勇迎擊三丫塘大破之圍乃解是役也幾瀕於危屬有天幸賊亦未審我虛實以故不得逞而西鄉遂爲所破賊休兵五日乃始進援湯溪然其後隊猶屯金華澧浦諸村意未忘我也十二月七日賊大舉踰大嶺我師扼嶺嶺不得入迺旁攻鮎魚嶺以撓我屢戰移時幾敗矣適援軍至賊始退而併力大嶺之北最高者曰虎車山賊先據之我以偏師窺其背壓賊軍而陳賊勢不得合并乃震駭潮湧而下顛崖隊墜尸枕藉山谷間俘十餘人以歸自是不敢復窺覬矣越月餘金華諸賊藥夜盡竄有逸賊自永康來者掩其後斬艾無算時猶未知郡城已復也嗚呼洪楊之亂毒螫徧海內隳名城屠重鎮勝兵宿將恆奔走而不暇給吾鄉以彈丸黑子之地大小數十戰捐軀數百輩雖妻挫而氣不少衰陷旬斷脰身膏原野一瞑而不返視夫詎非國家恩德之厚之入於人者深而諸君舍生犯難之功抑亦不可沒也

伊古以來。任天下之艱鉅者。莫不將之以誠。貞之以百折不回之氣。而非徒鬪機智者所能與。吾鄉俗善樸厚。民老死不見僞偽之習。與夫貧富相耀。機械相角之情。故其感槩而赴敵也。義不旋踵。勝無重賞。死無厚賻。惟恃此皎然之志。以鼓舞之。而民亦甘冒鋒鏑。而不之悔。嗚呼。蓋逮今不三十年。而風會亦少替矣。然則諸人之義勇奮發。毋亦其素所習者然邪。嗟乎。顧不偉哉。事既平。邦之人仕於朝者。具以聞。賜卹如例。復祔其主於京邸忠義祠。會城亦如之。既又念諸君保衛之庸。與死事之烈也。釀金錢若干。爲祠三楹於五指山之陽。祀先後歿於陳者凡一百十有八人。祔以義僕一人。置田如干畝。以其租入歲於孟冬嚴祠事焉。蓋祠所直。卽昔殲陳賊十三騎之地也。誕維諸義士生爲同仇。歿爲鬼雄。英颺毅爽。儵忽往來。將於是乎在。祠落成。同治二年十月。越光緒十有六年。一新迺始。追撫當時所聞見。書諸石。以告惇史。以諗吾鄉之人。俾無忘昔之艱危。而或淪其舊俗也。於是復爲禮神之詞。而以其死事者姓氏年月。鐫於碑陰。詞曰。

妖星墮兮天狗芒。攫獠磨芽兮肝人爲糧。疇非踐土兮起搯其吭。持寸丹兮質三光。山嶺嶄兮石齒齒。羣峭摩穹兮不可以趾。血瀑壁兮谷疊嶂。蠢爾羣醜兮敢踰此。忽挾棼兮奔雷。莽平原兮陳雲頽。張空夸兮飲白刃。靈何爲兮丁厥菑。勦遠征兮失地險。殲我良兮張寇讎。雄虺九首兮舌磔磔。南山雨兮冥冥。靈之來兮擁蜺旌。熱終古兮碧血長。無沫兮芳馨。化朱鳥兮味焉食。而跳踉兮殞而魄。朝飲而血兮夕寢而革。機槍埽兮幾星終。殫颺忽兮靈露濃。喪國殤兮帝教忠。義憤洩兮靈毋恫。坎擊鼓兮傳芭舞。強飲強食兮。

永綏茲土。

端溪書院祭全謝山先生文

朱一新

烏庠聖哲不作。坦途荆芳。啓儒熙學。華士噉名。末師詹詹。一孔墨守。界海區宋。自豐其部。卓哉先生。立言不朽。先生之學。宏博精博。詠稽經史。如衡受權。剖毫析芒。墜雲出淵。一義之獲。前無古賢。溯東學派。文成肇闢。念臺慎獨。曰彌其隙。都講梨洲。衍于四明。先生私淑。迺扶其精。學案初編。主張偏駁。先生廓之。宋元甄錄。彌朱祧王。論議精卓。習爽昭明。若龍銜燭。先生之文。闡幽表微。人倫扶植。經訓奮發。遷固匡劉。不名一師。勝國沙蟲。遺民霧豹。摻遐剔隱。章志貞教。百年時鐘。寸管照耀。作爲文章。原本忠孝。先生之行。冰瑩玉瑤。等身纂著。畢世坎珂。毛髮之利。如將浼我。鴻詞未試。奏賦漢廷。知狐工射。鵜鴂先鳴。女恥自銜。士恥自輕。屏跡權要。拂衣歸耕。折腰五斗。冷笑泉明。鬱水之陽。星巖之里。學侶莘莘。媚於文史。先生牖之。廉頑敦鄙。抱此遺經。與究終始。二策流傳。略覩宗旨。經師人師。無忝耳已。新也構昧。幸接鄉閭。欽遲懿範。胝沫遺書。偶險服領。遂廁皋比。顧瞻新廟。敬式前規。齋亭宿莽。鹿峽朝霏。先生之靈。倘此迢遞。學侶莘莘。今豈異昔。音徵雖邈。精誠不隔。趨向毋歧。進修毋畫。藐先生誨。繫予之責。承學者流。勉旃無斁。於餐蕉黃。靈其來格。尙饗。

景賢開祭文

中祀朱子。旁祀學中儒先十六人。首陳白沙及其徒八人。漢甘泉及其徒三人。皆近陸黃泰泉及其徒一人。近朱學。又有二人。爲王陽明之學。皆謝山先生所定。今閣重修。

於戲。道之彌於天壤也。如日月之麗乎穹蒼。測天者各立一元以起算。而皆可得夫離宿之度。弦望之常。

昔素王沒而數言絕論交已異夫子夏與子張儒分爲八執挈其綱路以多歧而惑道以紛競而亡博文約禮吾夫子所雅言也而致良知與尊德性亦聖門之緒論吾學之津梁高明者往往由之而捷悟傳習者乃或過焉而披猖陽儒陰釋之弊雖學辨中著其說矣蓋逆慮夫未流之恣肆而因咎夫始基之不臧然未嘗不取其操持之密質性之剛釋疑辨難舍短集長故鷺湖之詩雖云齟齬鹿洞之會頗無參商速有明之中葉士服習乎紫陽白沙變其師說風浴契乎點狂一傳而得文簡徒侶遂徧乎炎荒是時陽明提倡心學蓋亦始同而終異畫界而分疆獨泰泉窮理格物欲合新安之轍迹以窺洙泗之門牆於戲聖道大矣測者多方苟不迷於向往將百川學海而至海奚至航斷港與絕潢覺晚年定論之爲贅卽宗旨各異而何傷惟諸先生之卓犖生不同其指趣沒則同歆俎豆於斯堂一新忝徽國之苗裔恆望道而歎洋抗顏而爲諸生長彌悚惕而傍徨景行行止墜緒茫茫願諸生儀刑其鄉先哲而一新之蠢愚固陋亦將服膺祖訓而毋忘跪陳辭以抒誠奠桂醑與椒漿尙饗

祭李見羅先生文

名材江西人少從鄒東廓先生講學爲廣東憲議今書院其首闢也總督張某落其勝又不合於張江陵遂告歸今祀於景賢之旁

昔韓子言事有曠世而相感兮誠不自知其何心聖籌教於富庶兮固賢牧伯之所任判一官以衛道兮後之人涕泗而霑襟繫先生之耿介兮夙承師於東廓聞新建之風而興兮求緒山龍谿而考索義豸冠之岌岌兮馳錫節於交州殲羅平之妖鳥兮殄澥島之驚虬羌投戈而講藝兮曰余情其信娉以好修嗟粵士之溺俗兮疇澤躬於爾雅萃俊髦于精廬兮庇孤寒以廣廈闡曩哲之緒言兮辨一介於取舍來吾

導夫先路兮。毋自棄於聖者。何時俗之醜正兮。迺讒譏之高張。薺萊施其充壤兮。謂晚蘭其不芳。瞻講舍之將夷爲廐兮。慨子衿乎城闕。道既或隘乎時兮。胡久居此而鬱鬱。濯子纓於浪水兮。返予服於章門。願數枉以陳辭兮。虎豹守夫帝閣。予方高馳而不顧兮。細故營芥曾何足論。芬至今猶未沫兮。攬荃蓀之芳澤。惟介節之感人心兮。絲篴齡而無數。昔文翁之興學兮。就石室而祠之。矧先生之峻潔兮。吾黨百世之師。薦嘉醴以告虔兮。庶降鑒之在茲。尙饗。

擬補校經堂學約

曹廣權

漢唐以來論學之書。如劉子駿移太常博士。隋書經籍志。敍章矣。逮乎宋元之世。學規日程。諸作紛然。明儒講學。迭相踵述。國朝經術盛昌。鉅儒相承。特明家法。津逮來學。論箸尤詳。夫學術流弊。難可究詰。卑無高論。斬於切近而已。加以南北異宜。風尚殊趣。非夫身蒞目睹。洞曉癥結。雖汜論學派。臚陳漢宋。猶以水濟水。未見其能益也。今當輟軒之暇。訪察時會之變。斟酌往籍之言。定爲學約。共相質證。若其弗備。請俟來哲。

昔揚子雲有言。古之學者。耕且養。三年通一經。今諸生徵調入院。肄習三年。專治一經。自當通貫。但古書文在簡冊。半由口授。篤信師說。無有紛歧。近世載籍極博。支葉藩滋。記誦洽孰。於茲難矣。夫一經之大義。微言。文字。固炳。名物象數。事益繁費。語其淵浩。非蠡酌之能喻。由其精實。豈鑿空之可談。儻略探一節。弗求貫穿。譬猶庭列宮懸。六樂縣會。徒爲專壹之聽。怠窺鐘律之用。豈所謂擊其機要。達彼條流者哉。以故

學者偶暢疑滯。矜爲創獲。非是取稽曩籍。祇爲唾餘。卽以旁證他書。恆多參午。窮經之子。但爲口給取悅。於時不其惑乎。天算輿地。散見羣經史家之言。抑資考證。求裨實用。斯爲大宗。邇來算術圖學。超軼前古。塗徑維顯。軌轍易尋。所貴勿憚煩難。精益求精也。杜元凱論兵。譬諸破竹。數節之後。迎刃而解。得其次第。可用讀經。今試取天算輿地名物象數之屬。各於其黨。依次推求。雖多蒐討之勤。猶爲顓門之學。庶賢乎博而寡要。汎濫無歸者焉。顧亭林述其先訓曰。著書不如鈔書。斯言譴矣。經師傳注。將以傳信。本自師授。成一家言。安有故爲歧異。垂示將來。鄭君箋注。詩禮不合。此由禮注先行。不復追改。自發其凡。恐誣後人。大氏古人謬箸。辭有所受。覃精研思。匪由販鬻。其或一書所述。首尾不符。一人所傳。矛盾相嚮。非本隨文訓釋之方。必出師法傳聞之異。若使評處淵源之錄。譬曉注家之體。詳其離合。與之折中。誠免掛漏之僞。妄肆掊擊。豈假傳會之說。託於調停。故知功在蒐輯。事歸鈔錄。排比類聚。覽而遂通。如唐宋諸儒。託體書鈔六帖玉海等編。匪踵迹於類書。蓋治經之要訣也。且學人恆病。半在涉獵。居多暇晷。鮮克敷足。讀不終卷。輒易他編。亦既下帷探纂。自然堅坐。篇帙銜接。勢難中輟。既多卒業之書。彌絕坐馳之病。夫章句弗遺。貪多靡獲。孰與攝彼精要。便能鏤骨邪。若其體例。則商榷從心。變通惟己。總以存原書之次第。免割裂之深尤。庶庶可耳。

儒家述造。鈔纂而外。厥有日記。尋夫義例。非碩儒之所必構。由斯積彙。實樸學之所常基。有宋訖今。紀聞日鈔。割記雜志之倫。斐然有作。蓋宣尼垂飽食之箴。卜氏崇無忘之訓。羣居讌游。既有病於荒嬉。清言放

論。曾何裨於講肄。孫卿云。其爲人也。多暇日。其出入不遠矣。果爲嚴立程限。密出條理。每舉必書。有疑斯析。朝益暮習。顯其作輟之情。疑今察古。豈無心得之語。抑有瀏覽百家。綿裘充積。首末遐長。記憶茫昧。存紀厯略。時便檢尋。求諸自古。亦聞斯例。故知粗述六籍。儘拾糟魄之餘。培養新知。究資考銳之益。況乃隨筆斧藻。尤藉助於修辭。直書瑕譎。庶呈形以自詰。豈謂虛張部帙。浪費楮墨。乃類俗之文案。孔目通無實用者哉。夫流水不腐。見無息之常新。羣輕折軸。知積厚之增勢。習茲楷則。久自洽通。無爲鄙棄。聽其廢闕也。

學記云。一年視離經辨志。又曰。士先志。古人尙志。良有旨哉。蓋影不爲曲物而直。響不爲惡聲而美。此理章章。不易誣也。故志行不潔。則德器不崇。經術不講。斯光名不立。河間獻王。修學好古。實事求是。有聞漢氏。蔚爲儒宗。今諸生誠能踵曩賢之躋。薦潛摯之業。返性游心。絕去浮華。務使體識沖粹者。並列於方聞。才性開服者。益闔其幹略。詞章之士。納諸麗則之塗。考據之家。免其破碎之誚。庶幾言皆雅正。事無偏黨。知真師之所在。收耽道之宏益。斯則可矣。若使通無遠鑒。徒爲章句。將昔人所嗤爲女史誦詩。內豎傳令者。亦何能自外於此乎。且夫徵辟旣興。詔曰。茂材。表薦之書。辭稱名士。斯並崇獎人倫之風。信非抗顏期許之語。蓋高名可貴。副實綦難。愚者昧之。竊自標異。凌今轢古。何其厚誣。承學之徒。有類於斯。亦異乎被褐懷玉。闇然而日章者矣。若迺按試州郡。招振良逸。甄錄歸於至公。責在鑒識。俊造升由鄉學。事例遷除。黷校本無彥緣之階。精廬豈同奔競之藪。然自古文人結習。難免躁進。躁進彌甚。將遂傾軋。門戶因之而



分人心由其日壞。凡諸變態。可勝言哉。所願肄業諸生。秉停澆激薄之心。崇思患豫防之道。身範謨訓。共維條教。發藻儒林。揚袞經苑。仰奉朝廷右文之規。無陋前人興學之義。庶雅風崇厲而人才日盛矣。

勸葬說

知祁門縣事黃澍葵

上世舉委之溝壑。過而潁泚。古聖人易之以棺槨。所以教天下之孝也。夫天地生人有造有化。乘陽故造。乘陰故化。土爲陰氣所凝。故化者乘之。今死者既化。宜乘土氣以遂其化之機。葬書謂葬乘生氣。返氣納骨以蔭所生。尤洞廣勸葬說引語云。死人見土如見金。皆謂死當速葬也。考之古禮。證之今制。揆之人情。度之事理。無貴賤賢愚。莫不以人死速葬爲安。喪禮卽吉。始於虞而成於禪。虞之爲禮。起於既葬。送形而往。迎精而返。故爲虞以安之。故既葬而虞。未葬則無所爲虞。不虞則卒哭與祔。皆無所爲而舉。更何爲而可以練。可以祥。且禫歟。故形魄歸地。訓於禮。歸於其居。訓於詩。爲殯爲落。訓於書。五月三月一月而葬。詳於傳。況我朝禮教昌明。酌古定制。職官庶民。葬有常期。停棺託故不葬者。杖捌拾。著爲律令。使人知停棺爲法所不宥也。本縣蒞皖之初。卽聞徽屬積俗。多停棺不葬。竊嘗惻然於心。今以攝篆此邦。親見山郊厝棺纍積。甚至棺木朽壞。暴露尸骸。慘目痛心。下車伊始。業經出示曉諭。時逾兩月。查埋葬者尙屬寥寥。不忍遽加之誅。東萊呂氏曰。使民畏不如使民信。使民信不如使民樂。特再詳指其不葬之害。而明辨其所。以然之弊。夫墳上蓋土。必令緊築。郭璞經謂尸得陽風。陽水則腐臭。今僅以瓦覆其上。轉瞬破塌。雨雪浸漏。漸漬棺尸。必傷內漬。甚至山水暴發。狂流奔注。尸棺亦致漂沒。莫知其所。此不葬之爲害一也。秋冬烈



山延燒遍野。攢屋雜厝衰草之中。偶或殃及。勢必尸骸同爲灰燼。白骨狼藉。露燐煢煢。行路見而心酸。屬在同氣。乃竟堪此。此不葬之爲害二也。雲南爲煙瘴地。張經略廣泗駐軍丹江。兵多瘴死。究之古書。知瘴乃停棺不葬。歷四五年。陰毒凝成。因令盡棺掩埋。十年後丹江無瘴患。祁邑此時辰卯霧氣。觸之已能生疾。漸有瘴勢。若不亟爲改圖。必成嵐瘴。殃及生民。而不葬之爲害三也。曹彬圍江南。第三誓曰。平塚者必遭屠戮。以暴人骸骨。天亦報以骸骨之暴。今祁邑攢屋數椽之木。數片之瓦。不十年。親之骸骨暴於原野。夫暴人骸骨。猶及於禍。況暴親骸骨乎。天道循環。前車不遠。此不葬之爲害四也。祁雖富戶。宦族不多。然親死殯殮。知決不能皆效康節紙衣之示。保無姦人覬覦。採取殯資。發屋不如發塚之難。誠恐凶暴因乘便宜。災及亡骸。伯仁斫脛。隱憂方切。此不葬之爲害五也。神仙鬼怪之事。雖屬不經。閒亦可信。諸說部所載種種妖厲。大約塚中爲祟者十之三。停棺爲祟者十之七。神異記原爲攢棺者痛戒。恐質言無益。故鉤奇而描摹凶異。以爲當頭棒喝。太平廣記後序稱妖壇野廟。動作禍福。皆體魄不著土者。游魂爲厲。至於毛尸僵尸。數數噬人。夫以至親骸骨。淪爲妖厲。顧不寒心乎。此不葬之爲害六也。以上諸端。其事皆瞭如指掌。而祁之人顧相沿至今。而未有已者。豈皆昧昧哉。或惑於形家之言。謂吉壤驟難尋覓。不若渴葬以待。夫吉壤果可求而得。則爲地師者當早得之矣。張乖崖云。固有佳地。非葬師所能得。源乾曜得地於燕公門。袁安遇書生指地而得三公。孫鍾因少年乞瓜而封七世。得自無心。昭昭史冊。程子謂培其天理。始有地理。不顧先人懸錮之苦。而挾福庇子孫之鄙志。妄事營求。天理已亡。猶貿貿然乞靈於地理。可得乎。

不可得乎。又或謂無力營墳，以攢厝較易畢事。不知修葬稱家有無，富貴者豐碑華表，貧窮者負土成堆。古來厚葬之譏，不猶速朽爲桓司馬言也。況葬地皆有禮制，越制者禁，不及制者未聞干法。乃生者矜飾門面，忽令死者抱痛泉臺，此真不可解矣。又或謂尸骸移動，恐犯凶耗，存之封樹，不敢再謀窆窆，迨停之數十年，子姓漸衆，境遇不一，富者狃於便安，以爲庇蔭正長，貧者迫於饑寒，以爲墳塋不吉，一議捫葬，同室操戈，因循遷延，坐致尸骸遺瓦礫而不知救止，前移動而謂不可，後拋棄而苦無防，其悖謬有甚於此者哉。又或勢厚之家，謂喪葬事鉅，家長主之，而家長又以執吉凶陰陽之說，窮年無所就，突有事變，子弟遂無復前人之意，漠然置之，又或兄弟衆多，各延地師，各執意見，此曰吉，彼曰不吉，此曰可，彼曰不可，兩相持，卽兩相防，或至外貿經營，經年未歸，因相待而漸至相忘，嗟乎，其始並無終存於屋之心，其後乃成永不入土之禍，一倡百和，一時誤舉，釀爲厲階，迷罔之窮，指非爲是，遂至黑白易色，東西易位，而於積弊源流，不一究竟，良可痛已。本縣考古證今，度理揆情，不憚煩言，爲之破其迷而使之共悟，庶於輕重緩急先後之間，詳審較量，或圖變計，俾生者復其天，而死者安於地，舉百十年之沈痛，剔於崇朝，不其幸乎。爰爲明定章程，示以期限，誘以獎勵，其再有不率者，惟有盡法極懲，不稍瞻徇，爾神其無後悔，各宜凜遵。

## 到青陽任觀風示

知青陽縣事 湯壽潛

聖清昌明正學，南金東箭，四達掄才，秋簫春干，百家立學，臥碑具在，昭示周行，又以自明以來，偏重帖括，春秋束之高閣，儀禮苦其難讀，六藝否盲，八儒糅雜，詔徵博學宏詞者，再大輅旣啓，周轍咸遵，海內人立。

一遶翔實。其時皖南魁碩。肩背相望。青陽山縣。亦復人懷荆璧。家握隋珠。喬木餘陰。百年蔥鬱。斯文趾美。責在來者。迺者咸同之季。緒寇燧起。青道大通。賊梳兵篋。磨續十稔。鄉先達撰杖都講之所。半爲委燼。人跣土著。士失斗杓。訾謗者流。鳬趨麀聚。脂吻調舌。訐訟射利。膏肓不鍼。廢疾誰起。橫舍之敝。亦風會之憂也。夫學貴師承。亦需頓悟。好學深思。心知其意。大氏始於博探。終於約取。博探之義。如轅引隍。約取之規。如鼎毋肉。皆古而不通。今雖儒實儒。能文不足致用。雖士而俳。今者歐人之學。竊取東來。皮傳格物。昔墨翟氏儵忽始鑿。句而不達。遂使梟矚別種。擅其神奇。文學先生。驚爲河漢。其書具在。娠隅旣譯。涂徹易尋。有志之士。並宜覽觀。以濟世用。若復自封肘寸。輒論詩書。擅言道德。無補時艱。曷貴吾輩。此邦大好山水。九華尤秀。壓天柱。作鎮皖南。豈徒能降雨出雲。棲仙隱佛已邪。意必有偉人傑士。挺出其間。與山川靈秀相映發也。且文成講授。遺址猶留。同里末學。敢忘景企。茲幸恭膺除命。來領邑符。爲此示仰。闔邑舉貢生童等。知悉。昔輜軒問俗。太史有官。武城得人。澹臺斯選。君實爲腳踏實地之學。宜公有翰苑經世之文。如遇其人。懸榻以待。命題列後。自行備卷。請言盡各。以覘素蘊。凡隸轄境。無論遠近。自七月初十日起。予限四十日。雖未拘以全卷。亦期十事對九。多多益善。鶴俸之分。在所不吝。若僅有應制詩文。無一雜藝。文雖可觀。亦列中駟。或由學師轉交。或向本署徑繳。悉從其便。本縣學行。誥宓。忝竊華資。忝爲委韭。中外譏著。徒闕徑竇。何足爲多士師。惟仰體各大憲扶教翼民之德意。期於比戶絃歌。連壤鄒魯。樹旌發軔。提倡頗殷。多士各宜以時磨濯。蠲沒有成。植其遠藟之材。革其媒但之習。以爲齊萌望。毋使鄉先達專歉於前。本

縣有厚望焉。

勸捐積穀以備賑荒示

湯壽潛

爲勸捐義穀。設倉備賑事。聞髮難以前。青陽歲出之米。不敷歲食。必待他處之米。由大通進口接濟。約什之二三成。今大通出口之米。反恃青陽爲大宗。非田少而米多。蓋戶口盛衰。若是其懸殊也。合十七都勻算。客民倍土著。來者尙踵錯。環青皆山。沙石層下。溪河淤塞。水利大壞。無待災歉。已虞藉食。本縣來宰此邦。意謂必有例存倉穀。卽爲數無多。不難推廣其制。以期有備無患。乃倉則遺址不存。穀則半粒無着。城鄉皆然。嗟嗟。青陽爲池郡壯邑。并義倉之名而無之。天災代有。凡我父老。何不知遠慮若此。本縣愧無博濟之方。代廬然眉之亟。今幸華雲徧澤。畏壘大穰。特爲參考歷代常平社倉。及國朝諸先哲所輯議。華前縣奉憲議辦未果。各章程。汰其繁冗。挈其綱要。酌爲義倉事宜二十條。期吾民易知易從。勇於成事。富者捐此斗升而不費。貧者仍資挹注於將來。爲此剴切曉諭。仰士客紳耆軍民人等知悉。自示之後。務各遵照。後開事宜。踊躍樂輸。衆擎易舉。積少爲多。以成義舉。而防歉誠。本縣幸甚。地方幸甚。爾等須知本縣及瓜卽去。不能攜帶顆粒。而甫經下車。卽苦口婆心。爲爾等畫此備災禦患之計。稍有知識。必能仰體拳拳共贊成之。望切盼切。毋違特諭。

一建倉不必另立常平豐備便民等名目。致愚民未盡通曉。從實以義倉名之。如在一都則曰一都義倉。在一都一甲則曰一都一甲義倉之類。庶幾人人皆知。

一義倉無論在城在鄉。官爲頒立章程。卽由地方自行捐積。將穀數飭約報縣。縣但董率其成。不得主持其事。徒滋胥役之擾累。且防墨吏之侵移。

一都長甲長。必地方較有聲色之人。創辦時先責成該長等經理其事。以免議舉倉正。反致謀沮道旁。限到半月內。該長卽邀同該都甲衿董逐條妥商。卽將遵辦情形。飭約報縣。限十月終。將捐存穀數。榜出存穀之所。一面照簿錄副。飭約送縣備查。

一凡事歷久則弊生。目前先煩該長等經始。捐定後。該都甲另行公舉老成端謹者爲倉正倉副。便該長等交替。卽經理一無遺誤。亦必每歲一易。如該都甲殷實無多。此次交替之人。隔一年再行公舉亦可。仍請該長應替。亦無不可。總之不得一人聯辦二年。不能把持。庶免弊混。每交替時。倉簿倉數。均須會同該都甲衿董逐一驗明。

一此舉專爲備荒而設。積穀不積錢。卽有情願捐錢之戶。經理者刻日照數買穀存儲。緣錢較穀猶易挪移也。

一地方無論如何要工。如堤圩橋堰等類。各籌各款。總不準變穀抵用。先以買補爲詞。後遂推諉無著。一倉穀積存私家。他人不便隨時盤查。宜設在該都甲宗祠。或公所神廟。人人得以寓目。自然挪動爲難。但求高燥通風。不受低溼之地便佳。

一創辦時無力建倉。可先用簾廩或草囤暫行儲積。俟三年後。總核穀數。再議建倉。所費無多。當易集事。

一建倉不拘多少。一都一倉可。一都內一甲。一甲內一村。自爲一倉亦可。族大丁繁。一族一倉可。一房一派自爲一倉亦可。其巨鎮大集。除居民捐積倉穀以外。有好義商人公同籌款。購穀建倉。則曰某鎮各商義倉。亦屬有益無損。本縣一體旌獎。

一查華前縣奉各憲議辦之法。以每畝二三升爲限。今擬略仍前議。各都甲某家田若干畝。該長等就近易知。且有推書可核。畝各捐穀三升。但捐田主不捐佃戶。如係隔縣田主。先由佃戶墊捐。準於租內扣還。每畝三升。時價不過二十餘文。卽爲富不仁者亦當無甚吝惜。且今日所捐之穀。仍存於鄉里。將來所活之人。不出於親鄰。在貧難之戶以後領給。或較捐數爲多。自非頑梗。斷不致拒而不予。

一每畝三升以外。有慷慨好義。自願多捐。如至三十石以上。本縣給以獎額。親旌其門。六十石以上。本縣詳請府憲旌獎。捐至三百石以上。本縣詳請大憲題敕。以爲樂善好施者勸。

一不分土民客民。同住此甲。現在一律收捐。將來一律散給。其有手藝營生。無穀可捐者。每人以田三畝爲準。捐穀六升。其值不過四五十文。實在無力者免。靳不肯捐者亦無須勉強。

一義倉由各都各甲設立。捐穀後如續有移徙。不得以從前曾在某都甲捐穀若干。藉詞指索。其徙住之都甲。不得以此閒尙未捐過。不予散給。致令向隅。

一各都甲慶壽婚嫁等事。時所恆有。俗例必置酒張筵。以謝賀者。不如以醺會之貲。捐益倉穀。卽減半亦可。主者賀者。兩資遐福。能以賀儀充作穀捐。吉事有祥。尤可操券。

一各都甲每有演戲賽會建醮等事勞民傷財有害無利今勸令以此項歲用折數買穀化無益爲有益如相沿已久急切不能變通將上三項事減去其半提其半以爲買穀之需總之多存一粒即多有一粒好處全在該長等明白勸導切實奉行以期義舉人情兩無不順

一各都甲每有因事口角經長等調處服禮者可將服禮之費折捐倉穀

一捐穀應有限止酌中定數足支半年亦云小補一甲以一百戶計戶各三丁大小均算每丁日食穀一升每月共需穀九十擔半年需穀五百四十擔一俟捐及此數即一律停止免形竭澤如一甲內有好義之人概任一甲應捐全數此甲即不必零星再捐

一此穀雖由畝捐仍出樂輸未便責其乾圓一律有損即收先爲風曬耗蝕若干簿記其數不必注明其人以示善善從長

一常年息借有利小歉平糶有益亦本古法然出易入難各省倉穀名存實亡每坐此弊今本陶文毅所議不貪息借之利不泥平糶之益將此穀實存在倉小歉不得妄動實遇荒歲先期查明該都甲實在貧戶盡出賑之以極貧次貧中貧酌給穀之多寡將出賑之期飭約報縣有強索者衆共持之中稔仍照章捐積務令每甲足支半年之數而止

一出陳易新亦有流弊幸而五風十雨歲歲有秋既不息借又不平糶存積太久遂致紅朽耗蝕必多今擬以三年爲斷如積至三年無須散賑準於新穀將登以前由倉正倉副會同該長及衿董將舊穀出糶

一次立即買新穀抵補。一面將出糶買補之期。飭約報縣。方新穀未登時。穀價必湧。所得贏餘。足抵耗蝕。再有所餘。即可作建倉款。無庸另籌。

與重黎論新購鎮遠濟遠兩兵艦利病書

此函達呈乙覽

王詠寬

去夏出都辭別。猷領誨言。並承寵餞。謹志之不能忘。西渡以還。乍改寒暑。東望長安。無日不縈諸夢。穀也。弟羈寓柏林。一無建樹。觀風聞政。專恃調人耳目所及。稍廣視聽。仲夏中曾隨役溪耳。登覽諸艦。因識其大略。歸而考其圖式。參以西士之所論著。竊疑製造船學。非有心得。未易從事。然形勢利弊。亦有可得而言者。按西國兵船。近時皆有鍍甲。而快船戰艦。類分兩涂。其戰船之屬。初爲船旁列礮。一變爲船腰礮房。皆礮小甲薄。不足攻拒。又變而爲船面旋臺。始爲利器。敵巨甲厚英然尙有數病。未能盡善。於是有露臺旋礮之製。今定鎮二艦。仿是購造。實爲新式。顧鎮遠工料不及定遠。而當時價值計增十萬。如平面鋼甲改用熟鐵等事。此弟所未喻者也。快船之屬。專以巡海。亦能深入敵口。佐戰艦之用。西國有以厚甲專護水綫帶者。有增下艙平甲以禦彈上墜者。今濟遠速率十五海里。不爲不多。魚雷二筒安置船尾。差爲善法。然船面甲臺西國並無斯式。德國有二小艦不及千噸德海部新定一船。仍而不用。必有深意。不然。豈西人智術皆出李丹星下哉。蓋濟遠水綫無護。遇小彈即穿。其穹甲低水四尺。浮力無幾。隔堵水入。鼓側難免。斯時礮堡勢成上重。駕駛爲難。危險特甚。兵凶戰危。宜求萬全。乃以嘗試爲之。此又弟所未喻者也。濟遠造於伏爾鏗廠。初次試爲。本未盡善。廠中辦事人不自諱言其失。如機艙逼窄。絕無空隙。隻身側行。尙慮誤觸。日前



試機已有觸手成廢者。暑月炎燠。臨戰倉皇。並繕奏技。水管紆折。遠達汽鍋。歷次損修。甚爲不便。今尙泊馬拉地。不能隨定鎮備行。其下輪煤櫃。只容百噸。蓋以限於入水。諸弊叢生。英十五尺。然大沽口淺。已不能近。煙台旅順。無礙加深。倘增深一尺。可添煤四十噸。何所見不及於此。而礮房之藥氣悶人。令臺之布置不密。猶其弊之小者。今朝廷加意臺澎。飭照仿造。而劾侯傅相。意見不同。劾侯請侯回華察看。自是慎重。合肥謂不必久待。電令速購。豈成功期諸二年。而訂定不能遲諸兩月邪。此尤弟所未喻者也。聞之成事不說。遂事不諫。惟是將來各省。應有添造之舉。似宜精加考察。勿復狃於成見。質之高明。以爲何如。此邦水土。亦復宜人。天氣較涼。暑月可服棉裕。賤軀頑健。眠食如恆。惟學業荒蕪。祇益慙媿。知念增及。不盡區區。七月十日。詠霓再拜。

復晃州舒懷珉書

曹廣權

別來無恙。甚相念也。芝蔴先生歸。遞到惠書。並道垂問。鄙人甚殷。千里瑤華。無以爲報。迺就鄙意。爲吾子陳之。昔曾子有言。以文會友。以友輔仁。曷嘗深求之。而未得其通也。頃讀中庸。仁者人也。鄭注云。讀如相人偶之人。參以近儒經說。恍然若有所悟。其解詰尤切者。莫如阮文達。引曾子立言文云。人之相與。譬猶舟車然。相濟達。馬非馬不行。水非水不流。以證明鄭義。較之番禺陳氏。取中庸鄭注。肫肫懇懇。貌以密合。論語五十八章之所言。仁同一妙解。而本訓更章。叔重解仁云。人與人相親偶。从人二。此不段引申。而立人達人之宏愷。可以識矣。蓋四海之大。萬民之衆。一相人偶之所積而推也。故謂人人親親。長長而天下治。一人絜矩而天下平。反是則亂。夫人之相與。各有其情。不得其情。未有能相親也。以己度之。推其好惡。

然後其情可得。故恕爲行仁之方。曾子與聞一貫。不外忠恕。蓋非忠不能恕。強恕以求仁。正學者從入處也。讀聖賢書。而使遺其通義。茲輪扁所謂糟魄。將奚以爲。顧仁之取數至多。術亦衆矣。非博通今古。寂而求之一心。又將隨其性之所近。固於一偏。其爲仁非色取則好仁而愚耳。曷足貴也。故功又在好學。好學者於經史所陳大義無論已。其輿地制度名物。凡儒先之所考訂。皆平心以求其是。自觀其通。於立說者初無與也。但不昧所自足矣。若攻訐以爭勝。去讀經史之本心不亦遠乎。至於本朝掌故之籍。宜以時瀏覽。嘗念宋劉敞使契丹。遼人欲夸示險遠。故迂其途導之。敝窮其詐。遼人驚服。當時中外隔絕。輿圖不詳。而敞能知敵境道里之遠近。其平時稽考可知。近見中俄交界圖。北界多非乾隆內府地圖之舊。詢知爲近日使臣重定疆界。誤劃入彼。掌故之不習。患乃至此。苟有夙夜不忘在念者。吾知其心不安矣。顏之推家訓言。學猶種樹。春玩其華。秋登其實。講論文章。春華也。修身利行。秋實也。發明曾子以文會友二語。至爲明晰。蓋聖門之教。博文約禮。塗徑顯然。淺視之若千條萬緒。實則一貫之言。我輩初學。皆當心知其意。且所謂以文者。亦當返之於心。先自審其誠僞。大學以誠意爲首功。傳者首釋之。此學人所必爭也。苟卿有曰。今之學者。以爲禽犢。其言蓋以講學爲恥。論者謂與曾子會友之訓相反。烏知講論文章。所爭在一念誠僞之閒邪。近見學者免於苟卿所斥則幾矣。記曰。知者利仁。畏罪者強仁。我輩雖勿能知而罪必畏也。今當北征。念子遠離。敢以言共相勸勉。庶異時相見有以互質也。芝兄獨行君子。志操堅定。澹乎寡營。權每對之。自恨勿如吾子師之久。願時與往復。守其言以寡過。夫取友之道。篤行爲上。才性開敏次之。記

誦淹洽又次之。雖有他長。而心迹險惡。必慎與之。近世豪俊特起。不思無友矣。

與重黎書

瑞安黃紹箕仲駿

拙作承點定。理精且富。感荷無既。惟鄙人墨守朱子。其論二氏及諸儒處。皆略宗朱子文集及語類之遺意。長者深於二氏。故每以彼法論朱子。及諸儒。雖鄙陋藩牆之見。與深入堂奧者。不可同年而語。然根原不同。實是如此。如出世經世。尊見分爲二事。朱子意則以學與治爲一事。正使彼教亦言經世。亦能經世。而與吾儒之理。仍無涉。朱意謂流弊即在其出。世之學不在言經世。使吾儒不出而經世。亦并不言經世。而與彼教之理。亦無涉。朱子文集語類闢佛闢陸氏反覆專明此義。朱子以道與藝爲一事。尊見以爲二事。朱子通二氏。大要與闢二氏亦卽一事。而尊見亦分爲二事。尊論每以朱子講學多用權。而鄙人則覺其實。但自顧太淺陋。不敢復置辨。亦以此事非數語可了故也。此自是長者研究二氏。而性於釋氏爲尤近。故持論如此。道與儒其實較之釋氏尙爲體面以老氏爲作用。此學若成。合地球。上想無能當之者。他日必有此一派學問。朱子所謂合下有禪底意思。正是見之精處。斷非皮傳者所能及也。引喻從祀諸儒。陸王外添楊慈湖陳白沙諸先生。甚周密。但某公之學。佛學道似未深造。所念之道經殊不高。其兼綜三教。實近於朱子所謂不成箇物事者。故拙作引張良李泌。以其皆嘗辟穀。唐書泌傳謂泌自言尙時與赤松子王喬等游某公頗近似。而引富彥國趙閱道。以其皆讀佛經。但取古來闔人有粗跡可拈者。約略言之。如晉以前爲黃老之學者。宋以後講心宗者。皆不敢闌入。惟陸王則爲援釋入儒者之渠魁。故不得不一提。然陸王亦實嘗看佛經。慈湖未從祀。顧高同治年間亦未祀。未知後來曾添入否。其餘諸儒。或由冥悟。或卽從陸王出。

未必專從佛書討生活不止以顧高嘗闢王。哉山嘗闢王學末流爲因果之說者。故特不及之也。某公雖亦務靜坐。然止是善男子之流。端謹和平。自不可及。而殊乏光明俊偉之氣。講心宗者必不爾也。平時議論亦以謂有粗跡可據也。拙作大意。面子上是宗朱子。說二氏當闢。但其心得不可沒。骨子裏直說是能念經亦好。所得不深。其弊必不大耳。蓋某公所學之弊。止在其身不能及人。若真講心宗。便不敢測其流弊之所至。緣其好處與弊處皆太大也。此文因上半篇門面太大。故篇末略寓規勸。稍自文飾。以應篇首不敢貢諛之語。昨與可莊言。近來應酬文字。卽有好手筆。亦斷不能樸實寫出。所以斷不得佳。可莊云。若與某公爲老同年。竟可直說他所學不合。然猶賢乎已。我們則斷斷不配也。極荷垂愛。故不敢匿其區區。惟恕其愚妄而終教之。萬幸萬幸。

二

覆教透切之極。敬服敬服。此公先德。卽以儒門法語教人。以此養心。以聰訓澄懷二書藏身。二語可謂不刊之論。大約自呻吟語出後。士氣卽就衰。至國朝雍乾後尤甚。朱子謂東漢黨錮之後。士大夫閒必別造一種議論。父兄師長以相告誡。以爲避禍藏身之計。如聰訓澄懷兩書。殆此類也。以朱子議論及行事考之。則與近來宗朱學者判若天淵。直相背而馳耳。某公亦是胡伯始一流人。但底子尙忠厚。近每有講理學而甚巧。專以其所講之學爲做官趨避之用者。則尙不如之。其學還有極可笑者。他日當面陳也。長者

讀書博而見理甚深。豈可與近來講學閹人同日而語。姪每喜看顧亭林李穆堂諸先生。及近龔魏諸家集。而不願看學桐城派諸家之文。惟惜抱老人則不敢輕視。其餘則大率皮傅者耳。大抵道理自在天壤間。家數由人自立。工夫由人自做。但占得道理田地多者。乃占便宜。然以一時論。則特氣運。以一身論。則特氣魄。氣運好。氣魄大。便無論何家。俱做得成。然卻不能以此而抹卻所占道理之多少。近世氣運不佳。閹人又無氣魄。故無論學儒學佛學道。而皆爲鄉原之歸。此亦世運之隆洼升降所關。風會人才氣魄之薄。於是外患亟而彝霍乘虛。濁亂中夏之禍烈矣。長者以爲然乎否乎。

右仲弢兩書發擲有義味。能攻吾之短。取銘座右。策吾晚學炳燭之志。

三

莊氏集瀏覽一過。謹奉繳。劉舍人之贊。隱秀曰。深文隱蔚。餘味曲包。斯足當之矣。竊謂國朝公羊家推求大義。固多心得。然謂抉經心而戈達例。未敢遽信其然。獨其文詞則未有不奧衍而遒麗者。殆亦舍人所謂有助文章者歟。毘陵人文最盛。至如大雲之文本九流。茗柯之賦源漢魏。蒿庵之詩擬樂府。尤爲特出。非一州之所得專美。長者以爲何如。集中題仕女跨虎圖甚佳。紹箕適有此圖。他日當奉求賜題。並請大筆寫莊詩。以資諷覽也。吳禮北書聯埒繳。筆力洞達。而情趣索然。智過其師。乃可傳法。信非虛語。拙詩承改定數字。塙當之至。感荷無似。尊許過蒙獎借。向來作詩絕少。非惟才短。抑亦膽怯。後當稍稍爲之耳。

武昌張裕釗廉卿

日奉惠函，猥蒙齒及拙書，所以獎借之者，逾分溢量，使人媿惡無已。然往者嘗妄論宋元以後書，與漢唐人筆法判不相入，私究其故，漢唐人專從朴拙一路入，宋元明諸家則皆以取巧失之耳。因是以推論中國之治，所以大遠於古者，其弊亦正坐此。區內萬事萬物，必有大拙，乃得大巧，而巧者則莫不終歸於拙。今海外諸國所挾以陵轢我者，一皆以朴拙得之，其實則皆故書雅記九流家言古測算法之緒餘也。我蔑棄先聖之道，一切爲孤懸善道，傳風匿景之術，以相尙，而彼在在腳踏實地，操必勝之勢以制我，以實擊虛，焉往而不靡乎？閣下沈幾觀變，謂不若善刀而藏，誠亦有心人語。然相率引去，揆諸志士仁人之心，蓋亦不免怆然。聖人者不凝滯於物，而能與世推移，君子之道，或出或處，或默或語，神而明之，存乎其人耳。近刻重修南宮縣學記一紙，附呈，是正拙書，既不足觀，刻工又不如人意，聊博一粲而已。

張裕釗

所示大箸，偉論越世，廣學甄微，緝其指趣，九流爲近，古今之隨，中外之事，靡所不貫，故其發爲文章，議論怪奇，一辭一義，皆確有依據，非淺人陋儒所能望其項背。惟文章之道，以實爲體，以虛爲用，作者之實信美矣，更益游刃於虛，使其竅妙曲折，遠出於語言文字之外，則尤善之善者，邈乎其不可攀矣。來教綜論世變，頗有取於謔言，竊自喜其不謬，然得閣下究極言之，乃更恢之彌廣，按之愈深。今日之事，有能懸閣下之言以爲的，舉一世之積弊而盡易其故者，天下何遽不可爲哉？近感寒疾，雖稍瘥，尙未能復元，勉強數行，不盡百一，裕釗頓首。

順德李文田仲約

昨承教。遂往見。欲其暫留。委蛇朝列。得權宜之正。顧彼亦自有意。非決然舍去之謂。蓋謂邊事日難。旣不獲行。其區區之志。一旦投大遺艱。益無可補救。非經世肆志之人也。坐此益增幽憂之疾。以此議合之尊說所云。竟水乳而不可判。而此時則出處之宜。語默之審。各有用意之微別。自鄙人觀之。皆是也。然而不可以強同之也。一半日再詣罄。研秋編修未及約之偕往。草草手布。順承動定康勝。不宣。弟田頓首。

李文田

承示闕特勒碑。兩唐書均作特勒。當不誤。而耶律鑄親見此碑作特勤。云唐書誤。此當兩存之。莫能定也。甚寶甚寶。至謝至謝。

耶律鑄。移刺文正子也。著有雙溪醉隱集。和林詩注云。和林城。必伽可汗之故地也。歲乙未。聖朝太宗皇帝城此。起萬安宮。城西北七十里。有必伽可汗宮城遺址。城東北七十里。有唐明皇開元壬申御製御書闕特勤碑。其碑額及碑文。特勤皆是殷勤之勤字。唐新舊史皆作衙勒之勒字。誤也。云云。以上並是雙溪集語。

李文田

日來緣海子帖落。有派寫之件。遂不得奉詣領教。渴想殊深。黑龍江外記二本。從黃再同編脩處借來。請鈔訖交下。再還之也。中有六七倒亂篇第一頁。弟鈔本未校。恐不足用也。甯古塔記略。係沈子培秋曹本。

鈔出。並呈上。訖收。龍沙記略。卽朔方備乘本。無以異。惟述本堂集祖孫三人之詩。多有在記略外者。頃選出擇邊地詩鈔之。尙未完也。遲日再呈覽何如。柳邊記略。弟所籤有極謬誤者。昨方覺之。肇州在長白山之西五百餘里。以金史會甯府西至肇州五百五十里也。地理志。會甯倚有長白山。則今長白山北卽故會甯縣治。然則肇州當在今吉林城西南五百餘里。日前讀元史。以兀速刊本誤作元速蓋卽阿速。整合納吉利吉思之人食此地之鹽。故妄疑其與俄羅斯近。因以爲鄰近額爾古訥河。及緡金史。方知肇州四至。原自井然。此不足以辱博雅之一笑。明矣。楊大瓢不知肇州所在。此讀史欠細也。乞將此數語塗乙之。免被他人笑也。切懇切懇。文田頓首。

閩縣鄭孝胥太史

日月不居。遂成三年之別。每遇從都下來者。必歷訊朋舊近狀。書問雖疏。情念殊劇。不謂足下獨能見及。遠辱手筆。兼賜見懷之作。持玩累旬。惘然難釋。藉諗道履康勝。至以爲慰。咀味大集。信能勃率格律。逍遙興寄。非特運造之工。兼徵攝養之候。學人不乏。深造者誰。故知此事惟靜者乃得其妙也。子培先生。良恨久闊。閱世旣倦。益懷斯人。晤語之餘。代道鄙意。胥在此都。優游卒歲而已。東人浮淺。一知半解。沾沾自喜。鮮足可語。新法方熾。民氣不靖。其謀國者業已開之。謁蹶難輟。亦非有老謀長算耳。園中未能捐書。然近來此間亦無書可買。秋來得遵義鄭氏書看之。其精力誠有過人處。詩力亦銳。但似孟東野使人不懽爾吟咏。近亦廢業。正坐無同作者。今謹賦一律奉覽。劣可斷句而已。然鄙懷亦略盡矣。伏惟起居慎衛。孝胥



再拜。

詩一首

蹤跡宣南閣。情懷海外孤。佳書能見及。妍語故多殊。島族沿新法。賓僚踴腐儒。默慚袁伯業。勩力久過吾。

黃岡洪良品右臣

踵別未晤。弟有一言。屢欲陳於左右。因循未果。曩過尊慈。讀足下日記。枕藉經史。實事求是。非足下無可與言者。且事關貴鄉賢哲。非有公心大力。深悉此中是非得失之故。亦愛莫能助。疑莫能明。今足下有如此學識。復有如此遭際。將來表章經學。津逮後人。如阮芸臺之所爲。甚易易也。貴省鄉賢中。弟最佩服二人。在明唯王陽明。本朝唯毛西河。陽明道學實見諸施行。非空談心性者比。西河經學。確有心得。精審絕倫。非諸家所及。二人得名最高。得謗亦最重。王則張武承毀之。毛則全謝山毀之。其實皆門戶之私。不足據也。王尙有人昭雪之者。彭南昀著陽明釋毀錄。猶列諸兩廡配食之班。毛則經全謝山一言。近修國史者。總攬至欲屏諸文苑儒林之外。殊不可解。弟見宋元明以來。及本朝諸家經說甚多。嘗取西河全集覆對。始知西河所言。得經意處較多。較確。諸家通病。喜攻經。如尙書疏證。周禮辨喜誣古。如誦王肅造家語。古文尙書等類。以臆說爲故事。而西河獨無之。其識勝也。祇以措辭過激。得罪時流。事久論定。實爲本朝經學巨璧。弟唯不喜其舜典補亡及乾隆時。有人毀之於袁簡齋先生。簡齋曰。西河著書四百卷。本朝具此大手筆者。曾有幾人。誠公論也。今歲久原版無存。印本日稀。誠恐代遠。漸就漸滅。請於官閣文書之暇。

再加審定。籌資爲之。刻近時王船山集。亦湘人所校刊者。蓋表章先哲。想有同心也。弟素無學問。實以是非之公。不可混淆。嘗撰駁全謝山所論毛西河集數篇。附呈警正。并乞到官後暇時指示得失。此時行色匆匆。無暇及此。弟所以不憚觀縷者。誠以中懷有年。此時一別。未知聚首何時。特存此數行於行篋中。以爲異日考驗之券。沿途諸惟珍攝起居。不宜良品頓首。

無錫薛福成叔耘

頃奉五月杪惠函。就諗履新皖南。整頓百務。惟酬酢稍覺忙碌。兼抱西河之戚。修短繫乎定數。祇付之無可如何。尙望達觀自遣。勿過傷懷爲禱。閣下迴翔譯署。十有餘年。講求經濟。殆非一日。此次榮膺樞務。兼理吏治。不啻駕輕就熟。建樹自必卓然。酬應係官場積習。鄙性與台端皆非所宜。然亦祇能剴方爲圓。稍從宜從俗耳。弟商辦滇事。界務已蒞。現正議論商務。及互訂約稿。一兩月內。可望完竣。茲將摺片各稿。附寄台覽。便可知此事梗概。大約滇西八關九隘。內漢龍一關。自明卽淪於緬。今力爭回。自蠻募以北。昔董昔馬以西。野人山之地。居伊蠟瓦諸江之東。計千餘里。又自新街入募以南。擇人諸土司之地。二千餘里。今皆歸我鄣。展寬舊界。既有土司爲之屏障。復有形便可資控扼。此皆仰賴聖主威德。得以使行人有辭。可告無罪於良友者也。南皮公獎搢過情。無異嗜痂之癖。返衷循省。愧慙奚似。弟非但不敢望膺疆寄。亦實不敢望入譯解。是非之門。回京後。或但盤桓臺列。轉可將平日心所欲云者。多上數摺。一入譯解。便有拘束矣。此意祇可爲知己一二人道也。弟懷歸綦切。冀仰使至今尙無的耗。察度情形。能於明年春

夏之交回里已屬幸事。所謂欲速反遲者也。福成頓首。

閩縣王仁堪可莊

兩載潤州。若歷危坂。怔營汗栗。僅免蹉跌。周稱逾量。益增媿悚。比年江海口岸。事多據疾。固由彼族修誼。亦廉使之望。不足以鎮攝之。繡衣蒞止。使鳥獸之氓。一瞻儒臣敷布。意必有斂襟起敬者。新猷允升。延跂无極。仁堪學治未嫻。移換首郡。罷一切齋薰諷。使充知客。和尙不識真際。益趨熱惱。墮落可惡。惟是南遷以還。風物清美。老母迎養。慈體加蘇。是可以持慰有道舍弟。有九月到蘇之說。尙未甚決。仲毀子培諸君。音問闊絕。比得雲門書。以詩屬和。仁堪才力竭蹶。頓乏清興。是可媿耳。節齋太史。近自鄂歸。意將結屋匡廬。無負郭之田。高隱亦正不易也。惟希珍衛不具。仁堪謹肅。

湘潭王闓運王秋

五年之別。旦夕欽欽。比到衡陽。每與鄭洪侯話金清塵。方深懸想。欣聞新命。近履湖陰。來往江湖。不難把晤。展眉東笑。喜倍除官。卽諗敷政。獨奇揚仁祓俗。柏臺移代。想又推賢。甚幸甚企。闓運歸山八年。經營一宅。猶未架構。而友朋嫌其閒住。東扯西拉。自知無福荷鉏。仍當把筆。衡陽差僻。一席可容。留此三秋。無聊已極。所以不能隱者。無奈諸厚祿故人何也。更名匿迹。又所不行。知己聞之。必啞然矣。族子代縉。曾從事藥鎖二關。頗諳利弊。茲游江介。令謁鈴轅。如有可驅使。或能仰裨萬一。倘察其不堪。隨薦一處。令得棲泊。免更投他處。非賜多矣。鄙況具其面陳。知公劇故不多及。專頌台祺。不具。闓運再拜。

上元宗源瀚漕文

今春滿望繡衣過杭。得慰饑渴。旋知風利不泊。皖人已先償來蘇之望。未嘗不悵惘久之。七月中得賜書。遲遲未報者。以見索之閒過集。篋中已無須乞諸其鄰也。執事醞釀已深。斧柯得假。朝廷用通儒正人。漸儲疆寄。源瀚之喜。殆逾尋常。願執事本學道愛人之方。行察吏安民之政。錢穀隸藩。刑名隸臬。似乎巡道無權。然情親地近。專制一道。正得以詳觀熟察者。從容坐論於其閒。大清律。訴訟一門。列有專條。稽查詞訟。月報。審正枉斷。專責道員。今之分巡。往往不知。夫政平訟理。民間無歎息之聲。竊以爲安內攘外。機關頗繫乎此。執事儻屬賓僚。查出此條。從容舉辦。實力奉行。所以獲民而報國者。未必不基乎此也。拙刻閒過集。謏劣無似。執事經綸雷雨。胸有古今。此區區者。豈足以溷耳目。平生於獄訟最所措意。嚴瀨明州。手批訟牒之錄。存者逾尺。而此帙最略。刻印又最劣。斥散略盡。重承雅命。於他處索回一部。藉供誨正。閒有直抒胸臆之處。執事取其意而略其迹可也。瀚荏苒衰遲。無志進取。今年四月奉委江蘇督銷浙鹽局。設局於蘇州省城之金太史場。初到亦頗糾紛。今已漸可無事。行篋之書。燦陳一室。頗思重理舊業。倘得十年不調。苟思不與艸木同腐。然卽此亦豈可必哉。執事初到皖南。水土未服。百事方殷。又摧蘭玉。意與自必稍減。今則操縱漸熟。自有水到渠成之妙。聞賠項已將屆滿。提款亦已允還。至於蕪地。五方雜處。搆畔洋人。往來哥匪。似無非萌芽於莠民。除莠安良。重賴保甲。拙刻閒過集中。於保甲注意於墾荒之客民情。形有異。然立禁約。報增除。似頗補前人論保甲含意未申之隱。教之爲幸。源瀚頓首。

丹徒韓弼元起

辛未夏。白門快晤。得悉誦大箸。竊歎橫絕一世之才。不可羈勒之氣。閱人雖多。求如閣下比者。曾不多覩。別後常往來於心。不能已已。昨聞僉巡皖南。以文章發爲吏治。必有不猶夫人之所爲者。私心喜躍。亟思寓書。而自慚老朽。言無足重。是以欲吐仍茹。閣下不遺葑菲。惠然先施。且藻飾過當。非所敢承。乃知虛懷樂善。雖龍鍾之叟。一晤於數十年之前。而猶惓惓不忘如此。彼才十倍於弼元者。閣下之好之宜何如哉。諸葛忠武有言曰。集衆思。廣忠益。事有違覆。不憚十反。違覆參驗而得折衷。是猶棄弊屨而獲珠玉也。徐仲車戒黃魯直曰。慮不厭熟。則寡過。睦僚友則事舉。竊謂爲政大要。不外此數語。閣下推好賢之心。集衆善之益。行見聲施爛然。功勳卓著。此真弼元之所欲賀也。臨風仰企。一衣帶水。末由晤語。曷勝悵然。弼元頓首。

常熟翁斌孫駿夫

先祖事蹟湮沒不彰。得公一詩。當與文貞之笏並傳不朽。欽感何涯。原稿馳上。但乞寫入卷子。圖後空尺許。便可補錄先祖遺詩。公書古雅。度越近賢萬萬。向所愛慕。幸勿靳也。承示瓠卽執字案說文。凡率之屬皆从率。一曰讀若瓠。段氏曰。疑當作讀若執。又按漢書地理志。北海郡有瓠縣。師古曰。瓠卽執字。王子侯表有瓠節侯息。師古曰。瓠卽瓠字。又音孤。功臣表有瓠譚侯杆者。師古曰。瓠讀與瓠同。是瓠與執本可通段。而瓠卽瓠之或體。長者定魏笏瓠字爲執。確當不易。旌導將南。不獲長侍丈席。私心悵悵。殆不可言。斌孫頓首。

武岡鄧輔綸題之

輔綸與公同聲相思久矣。卒以天處一方。人事百違。未獲親接有道之光儀。至今胸臆以爲耿耿。去歲薄游大梁。奉新河帥告以執事之丰裁清峻。學殖宏深。實能遠出時賢之上。益敬識之不忘。不圖手教先施。辱愛逾分。慚感交并。見賜大集。莊誦一過。秀潤蒼古。無美不臻。視拙作郊寒島瘦。真如小巫見大巫矣。至弟初刻白香亭集外。災梨棗者。惟和陶詩一卷。茲謹與二竹祠詩刻石。緘封并呈。祈賜郢政。此外續存詩篇。其稿概存仙帥同年處。承允代弟刪校付梓。容俟成書後。當再寄求削定也。莊譚兩君。多年神交。無緣把晤。碧涓恒化已久。忽承遠懷舊雨。恍聞山陽笛韻。不禁愴然。江天在望。良會有日。書不盡意。輔綸頓首。

朱一新

秋閒接奉惠緘。允嫺久未有報。忽忽遂將改歲。願言之私。良不可任。邇惟興居晏福。致如遠頌。鳩江惠政。溢於人口。足爲吾道之光。惜弟遠阻郵籤。僅得從報章中略窺管豹。尙未能深悉其詳也。外官誠不易爲。近事尤多牽掣。來示所云。自是天下通病。以君處之。諒必游刃有餘。至於理財之道。畫清界限。而不至身爲怨府。此尤具見張弛得宜也。吏治民風。固非收效旦夕之事。亦非一人可爲之事。但能持之以恆。潛移默運。自必日起有功。若欲立起沈疴。當此之時。談何容易。大聲以色。事未行而掣吾肘者。已在其後矣。惟冀隆降日上。俾得益廣其施。則進退人才。轉移風氣。固反掌閒事耳。沿江上下。伏莽滋多。外夷苟一蠢動。則此輩皆將乘之而起。東南民力已竭。風氣益蠹。若使再有紛紜。誠未知何策以善其後。而風會之遷流。

乃至不可思議。來示所舉貴幕友之說。誠然誠然。以僕觀之。殆猶不止於斯也。天下大患在財匱。而尤莫患於少人才。財之息耗。半已授權於外夷。才之盛衰。初非外夷所得而操其柄也。乃外夷所賸削不盡者。吾自助以賸削之。謂之何哉。弟今冬本欲歸里。而牽於俗累。卒卒未遑。精力日衰。虛玷此席。良爲可媿。家慈明歲七旬。嚴君亦將望七。非人子遠遊之時。明秋決作歸計。當再過衡齋一罄積懷也。舍弟補缺之期。將近而復遠。大約在明後年。孺初遂已作古。亮生亦復倦遊。此間舊雨日稀。偶出殊無所詣。拉雜書此。以當面談。一新頓首。

朱一新

客臘聞公外擢之音。喜躍無似。卽欲備函馳賀。復慮河冰開後。騶從南來。此函轉致浮沈。是以遲遲未果。近接潞河舟次惠書。始知出京之期。乃在三月。行旌倥傯。猶復念及鄙生。語長心重。諷誦再三。感念深情。逾於濠梁潭水矣。當尊緘遞到之日。正賤軀困臥之時。小病兼旬。久稽裁答。罪甚歉甚。側聞政聲遡搖。綱舉目張。卹商惠課之稱。已傳遍大江南北。使君於此。故自不凡。從茲利澤施於一時。非僅爲吾黨交遊光寵已也。弟抵粵後。瞬逾五稔。恆苦痺溼之疾。每春夏間輒發。自笑此身幾如河決。須霜汛後。乃慶安瀾。歲歲修築隄防。僅足補苴罅漏。其不爲鄭州之大決者幸耳。諸生相依既久。頗能諒其庸愚。虛心聽受。惜新精力日頹。未有以少酬其意。去歲曾集答問之語。編爲四卷。以志鴻爪。至今無暇修改。終未完密。深恐有誤來學耳。來函以講席相約。故人厚誼。媿荷無任。鳩江與吾淵一水可通。便於養親。尤殷心感。惟公欲講

明慎修雙池之學術。則新媿非其人耳。鄙人與公二十年來。本如鑿岨之相依。今雖顯晦殊途。出處異致。而拳拳之私。未嘗一日去諸左右。若得時相晤對。何快如之。此閒明歲之局。未知果能擺脫否。卽或小有濡滯。亦終當從公飽看江南山色耳。舍弟補缺之期。聞前兩缺有爲部駁者。則當遞推而下。尙須俟諸明年。此舉本爲祿養計。而此中偏多曲折。欲速則不達。天下事大抵如斯。所得釐差。乃省局中之散席。非外廠也。近爲張廣州校府試卷。月餘尙未竣事。來示逃於佛老。此在鄙人樽散之身。則可。公則未可。至處身期於澹泊。不在大廈深簷云云。乃真名言也。弟嘗謂辦事者。大處著眼。小處下手。此雖老生常談。似可與前說相印證。拙作崇義祠碑。近始上石。敬呈一通。乞誨正。令郎近已令其應試否。小者當亦就傅矣。甚念。甚念。一新頓首。

## 陽湖屠 寄靜山

月初過謁。敬聆提命。載錫盛饌。更賦佳章。滄以至言。光茲行色。感荷感荷。伏惟夫子以綜核名實之才。劑中外盈虛之理。深抱玉卮無當之懼。而懷金隄奉土之心。內則撫綏疲民。外則控御異類。啓誘庠序。爲國家儲楨榦之材。高張桴鼓。爲閭閻靖姦宄之孽。勤勞日昃。追古循良。然猶官燭盈寸。刻之以賦詩。濁醪一甌。酌之以觴客。既保謝鯤巖壑之韻。無廢任昉山澤之遊。史稱劉穆之五官並用。極之左手畫圖。右手畫方。昔疑虛妄。今始信然。寄夙耽墳籍。亦嘗刻志爲文。恆苦辭不逮意。意不造適。一篇之成。動移晷景。當其沈思追索。至乃遺落世諦。及至艸稿既脫。仍乃了不異人。此後牽率酬應。彌不足觀矣。又性好穀梁。意存



規范。漢儒師說殘佚已多。苦心覃思。據經傳以正注疏。間有所得。出柳鍾侯許之外。他日擬著一書。名曰春秋穀梁規范。自愧力薄。不足起廢發墨。然已得條舉冰釋數十百事。存之篋笥。未敢自信。倘學業漸益。綴次粗就。當塵元覽。呈上近刻文一卷。詩三卷。合前刻並裝一冊。恭求削是。幸賜序言。弁之簡首。庶慰增驥之願。藉免投渥之災。又昨所和詩涂中翻閱。始覺複沓支離。輒稍改正。謹重錄上。并乞教焉。埤上石刻四種。三在領南。其一南唐井闌。近年出土。鄙郡外間流傳。尚未多見。或可增入石華簿錄。寄以十四日抵滬。候船未得徑去。十八日當可成行。謹手疏附承勳定曼福。

屠寄

首夏之月。從茆卿戶部處。敬奉賜書。責取近狀。淹留裁報。皇合鳴鼓。在三之義。情得自贖。敢終布其腹心。近者朝廷妙選文學。既許不次之擢。兼設左降之科。前輩通儒。精心奏藏。後生新進。拭目觀光。寄不學干祿之書。詎嫻應制之體。科學習氣。故當必無。詞林根柢。自然不具。遂乃錄奪史職。改隸田曹。星辰離離。五石下隕。飄風發發。六鵠退飛。雖揣分知涯。安拙若性。而不才取棄。實媿所天。昔歲壬辰。見知君子。吹噓增其光賈。拂拭愛其羽毛。善善從長。許與氣類。謂宜連鑣枚馬。接席揚班。岱嶽登封。艸儀縣叢。甘泉陪祀。託藥後車。絀金匱石室之書。奏長楊羽獵之賦。出典孝秀。振拔郡國之才。入綰絲綸。補綴衮衣之闕。性韻疏野。不稱華賁。任運浮沈。終負舉主。夫以木天清望。地絕攀陲。類璽玉繩。仰逼華蓋。時人號爲內相。觀者羨若登仙。今日一流。稍輕其選。何者。學士瀛州之數。已溢周禮之具官。元良羽翼之資。遲比漢郎之皓首。豐

貂有不足之患。金馬有苦飢之憂。然且朝夕乞貸。春秋典實。盛飾章服。腴充庖廚。駕車之牛。厥角可鑿。薦幣之雁。其毛必豐。樓生揚揚。傳餐於五侯之邸。宋鮑款款。日數於六卿之門。腋持素交。動有附屬。排斥勝己。中之謠言。呦呦鳴鹿。何嘗得食而相呼。閃閃短狐。但解含沙而射影。甚有邊韶儒者。託進於閹官。馬卿才人。借譽於狗監。崢嶸霜簡之効。頗匪風聞。跼踖叢棘之廷。何能置對。衣冠風氣。埽地盡矣。故知清濁之說。不在官品。美惡之間。正可齊物。爲牛爲馬。原無不應之呼。氏觸氏蠻。本處息爭之國。聖君賢相。如鑒私懷。回換一官。以完耿介。德莫厚焉。幸莫大焉。司空之屬。邦事斯掌。天地成平。山川奠定。宮省節儉。土木之功。不與簿領從容。官司之長。不督素流當職。無廢嘯歌。華胄所求。貪得閒簡。是以杜陵老去。裁取挂名。何遜才優。始云兼守。而寄一朝釋褐。踐此清階。襍被明時。平揖府主。明光畫省。坐擁香爐。建禮仙門。入操彤管。不收仰勞題柱。故乃上應列星。但起曹承務。地逼人稠。信有三世爲郎。何止十年不調。寄犬馬之齒。三十有九。本生母葉。春秋六十有八。爲貧而仕。本不擇官。及時而養。理須望祿。而崔亮停年之格。未必爲孝子而寬。方朔待詔之年。何處是索米之地。若使周旋粉署。扶服丹墀。依次真除。循勞出守。將生馬角。且俟河清。今歲十月。恭逢文母受釐。羣臣上壽。謬襄盛典。脫敍寸勤。竊不量力。頗思以邊郡自効。滇南偏遠。瘴癘所叢。莊躋自擅。楚威不有其地。孟獲反側。蜀相止服其心。遷謫遊魂。宵梁裹足。然風俗敦直。江山絳麗。尹珍好禮。來學汝南。呂凱執忠。不汗高定。碧雞金馬。流景出同之山。桐布箬船。浮貢蘭倉之水。文齊以之立節。張翥因而世官。國小易治。政拙可報。倘緣際會。藉展微勞。遠想折衷。敬言盡各。願聞誨誘。以發愚蒙。

時局艱危。儻忽萬變。管領一道。交涉務殷。惟爲國顧衛自愛。門下士堵寄頓首謹上。

秀水朱 采亮生

采自去年春間自晉越粵。三月中旬至羊城。四月中旬抵瓊台。粵東本多盜之區。瓊島孤懸。瘴癘素盛。黎客錯雜。尤易釀亂。內山黎歧。裸體文身。本極愚蠢。外匪闖入。煽惑劫制。流爲盜賊。地方文武。復不速行懲創。遂至釀成大禍。臺灣十年一亂。瓊郡自道光末迄前年。幾於無歲不滋事。惟其僻在海南。又值中原多故。下以諱飾爲能事。上以苟且爲治安。蓋稔亂已久矣。客有新老之分。自海北來海居。或至十餘世。言語風氣。自爲一種。其性悍戾。與土人積不相能。仇殺械鬪之事。所不能免。自同治五年。蔣大中丞剿平曹冲。安置餘匪於儋州臨高澄邁三邑。皆百戰劇賊。於是新老相倚。而其禍始烈。屢叛屢撫。屢剿屢劄。四年儋臨之事。十一年金江之變。殺掠甚慘。見於奏牘。香帥派馮萃亭軍門。劉淵亭鎮軍。方觀察長華。大舉剿辦。分路進兵。捕戮著匪。賊焰始衰。全瓊士民始有來蘇之望。然各崗黎匪。漏網踰伏。蠢然欲動者。仍實繁有徒。方觀察辦客家政。以賄成。尤爲弛縱。弟承乏其後。適值大軍凱撤之際。辦理善後。兼統瓊軍。鎮壓撫綏。費盡心力。去年冬間。盜賊蠭起。數路橫行。幸預備在先。隨起隨滅。弟復親出督辦。剿撫兼施。得不成事。本年春。又有陵水七弓黎匪。聚衆劫略。臨高番峒。客屯潰亂。焚殺之事。同時并起。勢頗凶悍。幸朱鎮達陸徐倬唐陞。分路邀擊。破散其衆。一月有餘。始得擒渠掃穴。東西兩路次第戡定。有此數戰。羣不逞之徒。知文吏能軍。漸次帖服。因以餘暇。搜捕積匪。清查匪鄉。海面大盜陳于卿。同時獲得。於是盜賊衰息。民獲息肩。

咸謂數十年所希有。至於善後諸事。五指山十字大路。前明邱文莊海忠介所留以有待者。現有防軍分駐。委員設局。商民往來。坦然無阻。聚落繁盛之區。設市場。建義學。荒陬窮谷。漸知識字讀書。開山伐木。尤爲興旺。惟銅礦開挖已久。商人未能獲利。然瓊境礦苗極多。俟之歲月。必有成效。香帥於瓊事竭盡心力。規畫靡遺。在事諸君。亦能羣策羣力。各展所長。故能粗有成效。弟適逢其會。差爲幸事。所可畏者。海南天氣炎溽。鬱爲瘴癘。物故者相屬不絕。甚至朝笑夕咷。閨門俱殉。用兵之際。尤爲憫念。弟去冬巡閱歸來。痼疾纏綿。至今未愈。一請開缺。再請接署。均未蒙允。似此病軀。勉留海外。恐難持久也。瓊台遠宦。魚雁遂稀。北望燕雲。未知何日重行握手。傾吐積忱。日下新聞。尙祈隨時示我。

秀水趙銘新又

昨奉手翰。感荷注存。先生吏牒之暇。癖好文字。當其擬心孤往。無古無今。獨闢奧窔。自成一子。乃所爲章奏。則又條析始末。指畫利病。精鑿不磨。他日持節方州。經畫取諸素裕矣。傾倒之私。何可涯量。銘株守局。差虛擲歲月。壯不如人。老無能爲。每一動念。輒自慙負。舊撰左傳質疑一編。擱置數年。不復省覽。欲爲姚氏類纂評注。以腹笥寒儉。未能遽成。哀輯約得千餘條。而其所不知者尙夥。如歐文山淵齊秦。堅白異同之辨。山淵齊秦。未考所出。震川有項脊軒記。亦不知項脊二字所本。熙甫先世諱隆者居太倉之項脊甫自號曰項脊生祖注安得居近有道。日日攜書相質。一割所疑乎。書中待考辨者無算。遲日再一一臚陳。敬求教益。銘學道未能。而宦情已淡。有一事爲證。有邱文斗者。挾相術游津門。士大夫奉爲神明。其人善諛。時亦

奇驗。大抵相司道必封疆。相府廳必監司。數月閒累數千金。鄙人固未一往也。嘗謂以十金贈相士。譽我監司。不足當屠門之囑。何如以十金購古書。猶得供數月咀含乎。承詢抱孫也未。今年家連屯蹇。兒媳夭亡。尙未續絃。小兒爲同鄉金荅人觀察邀課其次郎。館去敝寓不遠。家事得早晚相關也。亮生所治文略。河下流。頗著明效。今年并門大水。而彼處僅屬邑偏災。文略隄工。竟得完守。書來甚以爲幸。惟早衰多病。退志忤忤。未審上游借寇。意竟何如耳。陶方之廉使。精心求治。譽望翕然。實事求是。力矯粉飾積習。急切亦未易得手。期年後當百吏一新矣。蓉生侍御。以上言獲咎。朝陽鳴鳳。足爲吾黨之光。功名之際。處之澹然。其學識。愈不可及。今之古人也。尊老秋來差健。門戶獨支。亦無可奈何之事。庭芷觀察水師學堂。距銘處不過咫尺。各事其事。月僅一兩面耳。少陵云。儒雅吾師。其庭翁之謂歟。子虞過津。惜未一晤。前約攜贈我復堂類稿。後又不果。想在京師爲有力者奪去也。銘頓首。

與袁生書

沈惟賢

年矢催人。別來遂易寒暑。有願渡江。迄未克踐。常令西望於邑。夏秋兩得弟手札。勤勤懇懇之致。溢于子墨。天性純摯。此其徵已。惟循攬楷法。尙未令鰕生刮目。大率問學之途。唯嫻靜始能得之。古德云。攝心一處。便是功德叢林。謂心光聚於一處。無事不辦也。服膺斯語。恨未之逮。想研精覃思。乃能有一旦境智雙徹之時。臨池水黑。耽之若此。豈後古人。凡事皆然。豈獨一羈邪。聞叔渾雅好剖析兩戒。指隄八咳。不意千里外乃有同調。良爲忻然。惟是劇地之難。非先定分數。往往窮大而失其居。何願船之於北徼。徐星伯之

於西域卓然成一家言。然何論別失八里。徐考額爾齊斯。則並疏略。此如良農偶有越畔。亦考據家千慮之一失也。魏先生海國圖志。囊括四裔。可云不朽盛業。而考亡多疏。未必非愛博之病。官書西域圖志。以天竺爲今西藏。屬賓爲溫都斯坦。則又武斷之失也。大約官書莫善於滿洲源流。私家撰述自徐何外。莫精於張石洲蒙古游牧記。彼皆明於分數。故用力轉而成功奇。區區管闕之見。愈操愈約。今將于舍衛波羅奈故墟。釐有記述。而當搜采西史。旁及釋典。迺爲賅備。汲汲懼勿皇也。今左右承過庭之訓。更潛心嘿記。繼以年歲。足使驚拙望而卻步。方將西來。相與賞析爲快。

# 于湖題襟集

## 文三

### 策倭事三篇

#### 鑒往第一

台州王詠霓子鑒

竊詠霓伏讀七月初一日上諭朝鮮爲我大清藩屬二百餘年。中外所共知。本年四月間。朝鮮又有土匪變亂。當即諭令撥兵赴援。匪徒星散。乃倭人無故突入漢城。增兵萬餘。迫令朝鮮更改國政。各國公論。皆以日本師出無名。勸令撤兵。乃竟悍然不顧。是以添兵前往保護。詎乘我不備。傷我運船。渝盟肇釁。無理已極。著李鴻章嚴飭派出各軍。迅速進剿。以拯韓民於塗炭。毋得稍有退縮。等因。欽此。仰見聖天子撫綏藩服。仁至義盡。薄海臣民。莫不有敵愾同仇之念。顧自牙山開戰以來。我國之師恆小勝而大挫。其故何哉。則請以往事證之。往者平秀吉之寇朝鮮也。由釜山入韓京。高王奔義州。明大將李如松率師往救。平壤之戰。初獲小勝。迄南原尉山再戰而大潰。是時倭渠已踞漢城。明兵出關。遠涉數千里。其始以銳氣而勝。以爲倭不足平。其繼卒以輕敵而致敗。今中國平時上下議論。皆視倭爲易與。及連日守禦。每獲小勝。官軍皆有輕敵之心。其致挫者一也。往者壬午一役。我師先入韓京。倭人後至。不敢肆毒。甲申之事。我以駐韓之旅。先衛王宮。誅亂黨。故倭亦不得逞。今東學黨首禍。我不以一二萬人先守韓城。而僅以二千之

卒遠駐牙山。一任東人陸續濟師。數逾三萬。據城廂。遏關梁。阻要隘。主客之勢既異。衆寡之數亦殊。其致挫者二也。頃者牙山一役。置之死地。其兵事統於葉提督。故人自爲戰。卒能自拔以歸。雖傷亡實多。而殺敵之數逾倍。今各軍駐守平壤。不思分道進取。鳳山成川。彼分三路以來。而我不阻塞隘要。固守江面。聞左提督陣亡。葉帥麾軍遽退。各統領收不相救。是皆前敵無統號令不一之咎也。其致挫者三也。往者明救朝鮮。本兵石星議主封貢。沈惟敬爲倭所給。往返游說。故雖再議東征。而終於無功。蓋將戰而言和。足以懈軍士之心。今朝廷以慎戰之心。而出於不得不戰。亦和之一字誤之耳。倭人自維新以後。練兵籌餉。處心積慮。思得朝鮮以與我爲難者久矣。無端開衅。其所貪者土地人民。決非空言所能懾伏。卽令朝鮮許償兵費。而彼亦不肯退還也。其駐京使臣之所講。皆所以誑我使不速備。不謂我竟墮其術中。譬如弈棋。一著之差。步步落後矣。各統領雖盛暑出軍。既至平壤。則以爲休息之地。初時只以小隊放哨。漫謂倭人震恐。必來求講。又冀英俄諸國。或仍出而勸和。逍遙河上。老師糜餉。軍心之懈久矣。一旦倭人傾國而來。兵數驟增。後路恐阻。其致挫者四也。凡此皆陸軍之咎也。往者越南一役。法執政茹勒斐禮實主之。各黨人不欲也。議院中籌兵籌餉。每靳而抑之。是以陸續至越者。不過一二萬人。水師游弋。不過十餘木質快船。及最薄之鐵甲四艘耳。斯時我國定鎮二艦。尙未來華。南洋兵船無一足禦者。及諒山一勝。法議員首請罷斥茹魯。擇佛來西訥爲相。而遽允籌餉七十兆佛郎克。增兵二十萬人。是則諸報中所謂法國最貧者。非眞貧也。各黨魁忌茹魯之執政。思奪其位而已。西人每謂無甲之船不敵薄甲。薄甲之船不敵厚



甲如馬江之創。石浦之遁。皆無甲之船不敵。薄甲之明證也。越事之平已十年矣。向令我國多造戰艦。如定鎮者二十艘。如來遠者三四十艘。則歐州諸國尙不敢越雷池。顧乃因循粉飾。事過卽忘。不思懲愆之計。初時於英德兩廠定購四快船以外。未聞續製閩廠所造。如廣甲諸船。乃瑪尼託耳式。西人以爲淺水守口之用。不可以海上爭鋒。而日本近歲方繕治不已。以致力與我敵。大東溝之戰。彼之戰艦雖沈三艘。而我已失四船。所恃者惟定遠等五船而已。今以後水師卻敵。未有把握。此海軍日久無功之故也。夫日本罄通國之兵。不過二十餘萬。其敢與中國爲敵者。以俄人爲之護符。且必以利啗俄。與之立有密約。倭敗則俄將救之。論者皆言日本民窮財盡。將不可以爲國。不知倭人近年海關出入之數。每歲贏餘二三百萬。禍機之發。幸出於早。倘遲之十年。則其用恆足。而其患更深。由今日而言。勝負之數未可料也。往者不可諫。來者猶可追。故詳論之以爲今當事者之鑒。

### 慮患第一

今者牙山敗退。平壤潰失。陸軍之亡者約六七千矣。操江之禽。高陞之毀。致遠廣乙之沈沒。超勇揚威之損棄。海軍傷亡過二千人。而船械之失逾三四百萬矣。平壤爲朝鮮腹心之地。四通八達。北則有二路可通吉林。二路通奉省。其南則有三路可達韓京。不取平壤。則不能下韓。今我軍退守鳳凰城。敵方聲言由牛莊以窺盛京。而其實將以一軍綴我義州之師。以一軍由平壤北趨雷邊德州。賈州。而分爲二道。一由廣利定遠入寇輝發。則吉林震動。一由雲興銀州入寇榆樹溝。以窺修佳江。則興京戒嚴。諸將以陵寢重。

島。我爲之請而讓還高麗。彼以爲得其島。猶不足以扼俄。故終棄而不取。今予以保護之名。而不讓以利。益之實。若英人觀望而不肯前。則東事敗矣。計惟有許割朝鮮之南全羅慶尙二道爲英屬地。而北割平安咸鏡二道以爲我屬。則英必樂而從我。所謂屬地者。徵其賦稅。治其軍旅。其禮教刑罰。仍由該國地方官管理。不易其俗也。西國之於屬土。大都如是。我得其北二道。亦復如之。計朝鮮之境。尙有京畿江原黃海忠清四道。亦爲之教以治兵籌餉。脩鐵路。礮堡。船屯。以備不虞。其租稅所入。有不足。則兩國交貸之。有事。則合力以護之。如是。則韓境南不鄰於倭。北不接於俄。其君臣上下。可高枕而無憂矣。論者謂英護朝鮮。倭未必率師而去。退守境內。卽退矣。其如俄之不讓。何。不知倭人來往。必以船。以英戰艦之衆。水師之精。不徒可以使倭船無片甲得存。且用以盡封俄國各海口。而綽乎其有餘裕。如是。則中國沿海萬餘里之防。可無庸設。卽以所省之財力。防西北邊界。而亦無不足。如謂英人不守局外。有礙公法。則朝鮮本我藩屬。我應有請人保護之權。況公法之所持者理。行亦以勢爲衡。勢之所在。理卽隨之。英何憚而不爲。倘英俄因是而有戰事。計必在印度以西。阿富汗國之黑拉德。而不在朝鮮北境明矣。俄國帶甲六十萬。英兵平日戍印者十萬人。又教練印人兵二十萬。有事。則更運他處兵可一二十萬。以之戰守。則已。有餘。若俄欲盡調後備兵。則不足於餉。英財用足於俄。隨處可募。兩國相爭。亦未知鹿死誰手。萬一英之陸師不能勝俄。則歐洲之大局必壞。德奧義諸國亦將合力以扼之。是以鉅戰而終出於講。至於中國邊防。不易。則請借英兵四萬。供其資糧。屢以二萬分戍天山南北路。輔之以華兵六萬人。則新疆可守。以二萬出

之以海灣之地。又欲得臺灣以肥其國。如兵力既足。必與俄爭還庫頁故地。此時或與歐洲諸國約縱以禦俄人。其計未必不然。然既傳之足。又假以翼。俄將不可復制。俄愈強而德奧義不能犄角。英不能獨力擯之。受其患者首在印度。而蒙古新疆青海衛藏之患。卽繼之。故曰倭人不欲占奉吉者。懼與俄鄰界邊患增多。不易於防守也。然則今日奉吉之防。其果可緩乎哉。

### 善謀第三

防之道奈何。曰古之善謀國者。不爲福先。不爲禍隣。其不爲天下先者。非徒不爲戎首而已。以退爲進。以棄爲取。我處於萬全之地。而有其發之。莫敢撓也。隣國之爲我禍者。力不能敵。非徒避之而已。以弱役強。而強者反爲我役。致人而不致於人。則雖有強敵。不能出我之範圍也。今朝鮮之禍亟矣。倭人甘爲戎首。而俄將臨其後塵。約分其地。詭以爲得之自倭。代朝鮮爲守。以中國現有之兵力。必未能驅之出境。常以重兵爲戍也。卽勝矣。而沿海萬餘里。處處設防。費且不貲。彼將以師船乘隙奔突。飽掠卽颺。而我已不勝其擾。至於來歲海運梗阻。京庾缺供。尤事勢之可憂者。矧又有強隣如俄者。耽耽逐逐。肆彼要求。西據帕米爾。東占高麗海灣。我將何以應之。故居今日而謀東事。計惟明約英國。保護朝鮮。而藩封乃足以永固。夫英之肯護朝鮮者。非爲朝鮮也。懼俄得其地。立水師船屯。二十年而後。已且不能敵也。英人計歐洲諸國皆不足以敵俄。惟中國地大物博。又與緬甸爲隣。印度爲近。故亟望我之自強。以爲他日庶幾可與英協力以擯俄。論者僅謂英人保泰持盈。志在商務。而不貪我之土地。皆未見其隱者也。英曩者據巨文。

地力能保守則可以卻之。否則或出於講。講則我必棄朝鮮。彼不欲多占奉吉。將退還東省邊地。而數百年之藩屬。一旦拱手而讓諸他人矣。倭人據有朝鮮。必視如屬地。置其君如贅疣。爲之治內政。開金鐵。盡收八道利權。以繕軍旅。初時尙有起而爲難者。五年而後。諸道盡平。以其所得增置戰艦。不及十年。而臺灣之患作矣。我中國事過卽忘。玩愒如故。以後海戰將不能敵。則臺南北亦不可守。倘又爲倭人所得。則其國益富。其兵益精。十年而後。戰艦可增至一倍。爲東方強國。而倭人之心猶未饜也。方將與西班牙爭小呂宋。與和蘭爭婆羅洲。噶羅巴諸島。而其爲中國之患。安有已時。此倭之足慮者一也。俄國地廣兵多。水師戰艦有四十餘艘。而不能稱雄海上者。以所有海口。冬寒早冰。故不得多置師船。其欲得朝鮮之拉維里夫海灣。以爲水師屯埔者久矣。往者俄國新聞紙亦屢言之。今倭據朝鮮。必與俄有密約相助。而許割咸鏡道之半。其地冬日不冰。俄得之可廣備戰艦。以雄視東方。二十年後。俄之鐵路已達東海。水師鐵甲增造百餘艘。則可以南向而與英爭印度。若海上之戰不能勝俄。則印度孤懸於亞州。英兵在彼者久。戰而必困。而印人將畔而屬俄矣。英以印度爲外府。失之則其國頓弱。俄得印度。則其國益富。其兵益強。又二十年。而歐洲諸國。無一能與抗者。方蠶食之不盡。而其爲中國之患。可勝言耶。此俄之足慮者又其一也。論者謂俄人假途滅虢。朝鮮亡而倭亦隨之。不知俄虎狼之國也。歐洲諸國之畏俄。如六國之畏秦。曩者英法嘗合力以擠之。德奧義三國又聯盟以掎之。近法人雖與俄好。意欲借其力以報德人之仇。豈眞願其師船出地中海耶。倭雖至愚。亦不樂引虎自衛。推其謀欲取朝鮮以自廣。而恐爲俄所先也。姑餌

吉林黑省。繼之以華兵八萬人。則黑龍江以北之故土可收。其外蒙古諸盟。惟科布多恰克圖爲最要。我自以精兵六萬分布其地。以攻爲守。則烏梁海之險可復。當其時法美諸邦。或起而爲調人。於是北以外興安嶺爲界。而至於尼布楚城。復康熙界碑之舊。西以阿克達山爲鎮。取回帕米爾。復乾隆御碑之城。如是則中國永無邊患。英保阿富汗。申明界址。而五印度安如磐石。俄人迫於衆勢。俯首就和。尋維也納之盟。不復以師船出君士但丁海峽。倭則還我琉球藩國。償我兵費。誓不相擾。如是則亞歐二州太平之局永矣。豈不善哉。

### 條陳時務八事

王詠霓

一審敵五大洲之勢。已成戰國。強鄰交錯。未有獨立而可以爲國者。是以倭與法合。英與德好。德人合奧以拒俄。合義以拒法。勢不得不然也。今倭踞朝鮮。必與俄有密約相助。以咸鏡道讓俄。而英人深忌之。故暗助我。我平日一視同仁。無所厚薄。又和約中一體均霑四字。受虧已不少矣。若於今日繙然改圖。計惟厚交英德以防俄。日如法助俄以爲難。則我必求助於奧義。縱橫之局。固如斯也。倭通國兵常備三萬七千八百二十三人。後備兵一萬六千八十人。實備兵四萬二千六百六人。國民兵八十八萬五千九十九人。總共九十八萬五千五百九十九人。兵數亦不爲不多。聞調赴朝鮮者十三萬餘人。頃又有五萬人於大連灣左近登陸。是已徵及豫備之外。倭自平西鄉隆盛。積存四千餘萬。近時歲入八千餘萬元。庫藏當更不少。而開衅之初。卽以鐵路押借洋款。其預籌餉源。必求寬裕。若是諸報中言彼國民窮財盡。非篤論也。今

彼方專意奉京旅順諸處。意將據地以要和。所謂志在北京者。不過大言欺人。分我兵力。此時應無暇闖入長江。惟是我軍出關師盛。如彼不能敵。勢必以師船乘隙奔突南洋各口。飽掠即颺。爲可慮耳。今毋幸其不來。幸敵之緩來。而我得急謀戰守之具。應請函丈采擇。明約英國共護朝鮮之前議。力求宸斷。一面密飭江海鎮江兩關道。加意聯絡英德奧義四國領事。庶得實力和好之益。

一籌防南洋巡船。如開濟寶泰南琛南瑞保民各船。均係木質。速率不多。礮位不大。無一可與敵人海上交鋒。故設防惟礮臺是恃。聞吳淞口礮臺布置周密。礮大及遠。當可無虞。長江門戶。江陰第一。圖山次之。焦象又次之。十年前見各礮臺彈重不過三四百磅。近時江陰新置克虜伯礮。未知何如。白茆沙地面太寬。雖有沙線。頗難扼守。若專守江陰。則狼山以下。均棄以資敵。似亦非計。至江北裏下河一帶。港汊甚多。敵兵隨處可以登岸。掠我糧食。如敵來海上。能於海上禦之。豈不甚善。查南洋定造雷艇四號。尙未來華。北洋近有購買船械之議。據申報言。向智利購船。將到新嘉坡。未知確否。智國鐵甲戰船只三號。穹甲快船二號。此次所購未知何式。往時張君幼樵有合七省之力。創海軍三大支之說。去歲峴帥初意亦擬造甲船。如吾師籌款有著。尙祈急購各國現有之船。取速率之大。礮力之猛。而鐵甲不求甚厚。則價可稍廉。而戰亦合用。若得鐵艦三艘。穹甲快船六艘。輔之以雷艇。亦足以自成一軍。約計價值不及一千萬。至於海軍以船埠爲首要。北洋經營旅順。不置塢於膠州灣。此失計之甚者。曩年力爭之而不能得。今合肥知悔。已無及矣。江南本無船塢。亦無海灣。可作水師屯塢。竊謂南洋防務。應合浙江爲一氣。以兩省之地通。

力合作。無畛域之分。則易於集事。詒寬嘗考核沿海各西圖。惟浙江之象山灣形勝最善。如蒙留意。當俟別爲圖說。附呈采擇。

一練兵。初曾文正公創議練兵。抽調綠營。厚加月餉。本無缺額。浸漸缺而不補。遂多匿餉。管帶者視爲利藪。遂多四五成之隊。臨事徵調。招補無由。在上者明知之而不能革。勇營匿餉。更無可稽。此通弊也。新募之勇。烏合市人。不諳放准。又開差之日。不給全餉。有半途而潰散者。遣臨前敵。何以制勝。近來洋操步伐。固是整齊。然方陳跪伏。只防馬隊。西人陸操。亦尙衝法。且知多作散陳。以避炸彈。我兵不盡習之也。林木窄路。濠壘攻守。隨步換形。即使精練純熟。以視有勇知方。尙落第二義。練手足易。練心膽難。是其徵矣。詒寬嘗謂近時各省督撫中。知兵無過於吾師者。李臨淮以五百騎入朔方軍。旌旗變色。壁壘改觀。亦是賞罰嚴明。使人人知恩。知畏。故耳。尙望轉飭各營統領。勤加訓練。鼓其忠義之氣。一面札飭營務處人員。不時調點名。痛洗缺額之弊。庶幾寅調卯發。不至遷延。又兵船中水勇有膽怯不任戰者。許其自行呈明革退。另募江浙閩廣海濱。習風濤。敢死之人充補。或於長江水師中挑選有膽略。曾經戰陳者調入。卽兵輪員弁。亦准更換。則餉不虛糜。而戰有把握。

一擇器。器械不精。是以卒委敵也。我國近年禁買外洋軍火。臨渴掘井。急何能擇。廢舊之器。賤購充數。又各營所用槍礮。不能一律。裝藥子彈時虞捍格。如此次安徽調兵一千六百人。而槍有毛瑟。黎意來復三種之異。是其明證。今思變計。應首嚴抉擇。伏查防海巨礮。應專取克虜伯。南洋舊有之阿模士莊礮。只宜



置之後路散地。至陸路快放小礮。亦以克虜伯之八九生的爲最。哈乞開司哪登飛不及也。連珠礮以哈乞開司五管爲善。而哪登飛格林孟替尼不及也。以上均應電託出使大臣代購。交商運華。以多爲貴。其滬廠自造之快利鎗。聞頗靈便。應請飭各局專製此種鎗彈。發給各營。以資學習。若辰下急於應敵。應查某營共有每種鎗若干。合計通省應用若干彈藥。先令各局速製。不足則速向外洋配運。毋使稍乏。水雷之用。不及魚雷。聞刷次考夫燐銅祕製。北洋已有傳授。應請咨調津局巧匠幾人。來甯教習。則金陵亦不難自造。聞江甯藥局。只能造黑色餅藥。然不如栗色之善。應請咨北洋調能自製栗色藥之工匠來甯。一并教習。庶器皆適用。而工歸實際矣。

一裕饒。兩江地大物博。昔年積存五百餘萬法越之役。罄盡無遺。近峴帥以節省之效。庫存及二百萬。茲以購造雷艇。支發行軍三十營之餉。聞已搜羅殆盡。爲今日計。固以息借商款爲第一義。上海鎮江蘇州江甯均商富聚居之地。勸籌千萬。似覺易成。近見藩示章程。亦復周密。但示信於民。無不樂輸也。其次則兩淮鹽票。當時售值甚賤。今每票漲至五六千金。有近一萬者。竊謂鹽斤加價。不如照票加捐。如每票限令繳銀五百。給換新票。准行十年。則所入甚鉅。否則仿照左文襄舊章。添售新票。以每張三千兩計之。二千票可得六百萬。此事不過票商半係巨紳顯宦之家。不願兼行新票。其實權操自上。彼亦不能阻撓也。聞漢口有捐輸房租之政。是亦籌餉大宗。蓋民間置業。田地與房屋同一取息。顧田有完糧。而屋無捐稅。頗失公平。今取民二十之一。不爲苛也。擬請於蘇甯上海鎮江諸處。先行試辦。則歲入當已不少。若一時



權宜應急之用。惟有暫借洋款一二千萬。以之定購船礮。運買軍火。以外洋之款。爲外洋之用。則利息應輕。匯費亦省。軍火既足。卽轉資各省。亦可收回價值。吾師前在廣東。厚集軍械。雖各省有欠繳之款。而於大局所裨。實宏遠矣。

一量才。十室之邑。必有忠信。故不患無才之足用。患在平時不留意造就。臨事遂無足恃。今北洋之病。正坐此耳。兩江爲人才淵藪。以詠霓所知。道員中如徐壽朋。陸元鼎。楊兆璽。阮祖棠。四君皆歷練洋務。精明篤實。足以倚任。外此亦不無奔走禦侮之才。長江水師黃提督少春。忠勇夙著。公正廉明。干城之選。惜爲閩所留。未能遽蒞。聞劉省帥頗有聞鶴起舞之思。但不欲受人節度。又與西平和戰異議。竟未出山。倘吾師爲之疏薦於朝。畀以關外督師重權。必能勝任。或以禮相羅。延住金陵舊宅。便中諮訪。亦足以集思廣益。鑒別將材。又近來宿將中知名者。大都調赴奉直。惟騰越張鎮松。林係毅軍舊部。最得力者。其人謀勇兼優。在馬鎮玉崑之上。又霆軍分統婁軍門雲慶。未知現在何處。吾師善於將將。倘蒙識拔。奏調防次。必能得力。皖省中統兵諸將。以良字營張士元。山字營王心忠爲最。現分防東西梁山。攔江礮諸處。是亦可用之才也。

一利運。海運之利。宜於承平。一有海氛。深虞梗阻。往年函丈奏開蘆漢鐵路。甚裨時局。顧合肥之意。深恐商局輪船。頓少運糧水腳。故仍主津通。不得則改造山海關外。此一己之私見也。今爲目前急務。似宜先造濟甯至臨清一段。查地長不過三百里。所費有限。如鄂省鐵政局所出鐵軌。足敷應用。豈不甚善。否則

暫向外洋購辦鐵軌。尅期集事。以每里五千金計之。不過百五十萬。以每日六里計之。不過五十日可成。惟輪車過黃河。應仿西人用輪船載車并渡之法。此路一成。則百萬之漕。均可由此轉運。其地界雖屬東省。而南漕出於江浙。應請吾師先事預謀。奏明辦理。或官督商辦。或官商合辦。養路之費。不憂無出。而於倉庾正供。甚有裨益。將來徐議南北陸續接造。獲利更多矣。

一開鑛。五金之產。以煤爲最。軍事既興。煤價驟長。開平基隆各鑛。恐不足供江省之需。查池州屬境雖有煤窿。然均係白煤。不足爲機器之用。惟鎮江境內之山。煤苗甚旺。且質是煙煤。與基隆不相上下。又安徽太湖縣境內數十里地面。均見煤炭。居民俯拾卽是。若設法開采。不徒裕國。亦可利民。現據劉令壽言。該處紳士多願意官爲設局。卽以人力開辦。所費不過數千金。而每日所出噸數不少。以一噸除工本水腳。外獲利一元計之。歲入已多。可否飭令鑛師分往鎮江太湖諸處查驗。如所報非虛。卽行札飭兩省藩司。遴委幹員。先撥輕本。以人力試辦。一俟利款充盈。然後購用機器開采。是亦生財之一道也。

### 續上條陳管見六事

王詠霓

一審彼己。孫子曰。知彼知己。勝乃不殆。今倭夷上下一心。謀占朝鮮者。十餘年於茲矣。一旦兵連禍結。實有欲罷不能之勢。蓋敵國之患。與內地寇盜異。草竊之輩。勝則聚而爲賊。敗則散而爲民。本無常數。敵國則數萬人不濟。將繼以一二十萬。又不濟。則必爭以傾國之師。其勢固如是也。查倭國常備兵三萬七千八百二十三人。後備兵一萬六千八十人。豫備兵四萬二千六百六人。國民兵八十八萬五千九十人。總

共九十八萬一千五百九十九人。其兵額雖不如我國之多。而此次起衅之初。卽調赴高麗十三萬人。又招募山東丁壯馬賊爲一軍。約三萬人。以爲衝鋒。募朝鮮土人爲一軍。約四萬人。爲次衝。我前敵之師。合毅奉銘盛各軍。不過三萬有餘。是衆寡之勢已相懸也。初我軍防旅順大連灣者二十餘營。事亟則均赴前敵。而填紮者有桂字三營和字三營外。間亦無幾。倭兵自金州登陸已有五萬。大連灣礮臺未知能否足恃。萬一旅順失守。則北洋已無船塢。海軍諸艦未免寒心。又彼軍所用礮。均係仿造克虜伯快放陸路礮。其槍用本國新造之村田快槍。各營一律。我國陸軍快礮。不過格林舊式。不能及遠。或雜用前膛小礮。兵槍尤爲雜亂。或用馬梯尼。或用毛瑟。或用林明敦。或用黎意。或用前膛來復。裝藥子彈。各不相習。卽有捍格之虞。津滬各局製造撥發。亦甚煩費。是軍實利鈍之數。又有殊也。論者均謂兵貴精不貴多。然兩敵相角。力相若。則衆者恆勝。彼國蓄謀決戰。事事占先。我不預調。各直省練軍全數出關。遣赴前敵。已爲失算。爲今日計。惟有嚴飭各軍。固守要隘。不許更退一步。一面通飭各省。除新疆臺灣不調外。將所有已練之兵。舊防之勇。全行調往奉直。一俟大兵雲集。卽圖進取。並飭各省另募新兵。教練數月。以備後繼。則將來戰事必有把握。卽彼爭以傾國之師。而吾亦自有禦侮之衆。至旅順防兵。無路可退。可以重賞激令固守。惟以戰艦運送軍火糧食。使足以支一年。一面檄調一軍五六萬人。由復州南下。以攻敵兵在金州者之背。庶幾兩路夾攻。可圖剋復。

一明攻守。善攻者敵不知其所守。善守者敵不知其所攻。今我前敵各軍。未嘗攻人一步。往往株守一城。

不力扼要隘。試思近今礮力之猛。舊式城垣已無守法。惟有於去城外數里路口。築不連礮堡。以阻敵軍。其馬步各營。退紮於後。以資接應。敵來時。先以礮兵攻擊。俟敵氣稍衰。即以步兵衝出接戰。以馬兵從左右包抄。必能獲勝。西人操法。亦知專用火鎗。不能得力。故未近槍界。不許亂放。已近二百步之內。即令停槍裝藥。直衝敵陣。皆所以節省子藥。而作其勇往之氣也。方陳本是古法。衛青劉裕皆用之。所謂先爲不可勝。以待敵之可勝。近西人兼習跪伏。以拒馬隊。然多受炸彈之傷。故平時操法。多作散陣。山林險阻。地換形苟。非敵騎馳犯。不遽下擠密之令。若欲攻敵礮臺。非學西人平行三路法。不能取勝。其法以之字路進兵。隨路挖濠築堤。以爲隱蔽。架槍礮其上。步步逼攻。雖曠日持久。而受傷較少。其升梯急登之法。尤爲最要。能於昏夜濟師。則敵或不及防。而難於固守。應請飭令各軍統領。教練兵士。學習攻守諸法。庶幾臨陣不致心慌意亂。

一厚閒謀。凡軍行之要。首重閒謀。無論通都大邑。山川形勝。衢路扼要。統兵者宜爛熟於胸。卽村莊平林。溪谷樵徑。均須遣探明白。繪成圖說。平時我軍各營哨官。亦須略辨方向。又須重雇土人誠信者。以爲鄉導。否則慮受敵之紿也。凡敵軍舉動。非諜不明。是非厚加重賞。不能得其確情。此次各軍自抵平壤。暑熱多病。朝鮮地方官。反以情輸敵。又許令韓民出城遷葬厝柩。孰知皆係倭人所使。暗伏地雷。我軍毫不之覺。及四圍布置已密。盡銳來攻。我兵潰退時。死於地雷者數千人。又敵人招募我國游民爲軍。月餉十元。馬賊之餉尤重。以致樂爲致死。首先犯陣。聞盛軍潰。逃者有數千人降敵焉。知無暗中通賊。爲彼招誘。此

皆不開開謀之咎也。故欲審地勢。得敵情。必多縱反間。使彼軍與新附之軍各相疑貳。然後密遣親信。游說馬賊渠魁。許以重賞。屬令乘機反正。立功殺敵。卽敵所募韓軍。亦可以此法行之。是爲用間之術。敵人旣入我境。則我之用謀。卽以我國人爲之。東省中平日在朝鮮小本經紀者不少。皆能通韓地方言。若以重賞募遣。必能得力。如我軍已入韓境。則又須韓人略通倭語者爲我偵探。其鄉導亦必用韓人。然須分各路偵探。如所報相同。卽係真實。否則懼我所用之謀。反中敵計。是爲用謀之要。應請飭下前敵統兵大臣。廣布耳目。持以愼密。不惜多金。爲開謀之用。其於行軍所益匪淺。

一嚴軍令。賞罰不明。無以馭衆。臨陣退縮。律有明條。李光弼之拒史思明也。河陽之戰。致死力鬪。其將郝廷玉以騎三百當賊西北隅。最堅之陣。廷玉奔還。命左右取其首。廷玉曰。馬中箭。非敢還也。令易馬遣之。僕固懷恩及其子瑒戰少卻。光弼又命取其首。懷恩父子願見使者。提刀馳來。更前決戰。於是諸將齊進。致死。遂破賊兵。蓋臨陣退縮。雖大將必立斬以徇。所以一軍士之心。而戰無不勝也。今我國統兵大員。平時軍實本不足額。隊伍不過四五成。又扣發軍餉。士心久離。平壤之役。各統領置酒高會。縱令軍士姦淫擄掠。賊來則戰。不相援。敗不相救。聞濟遠管駕方伯謙。業以畏葸誤公正法。已足以申軍憲。近見諭旨有衛汝貴臨敵退縮。剋扣軍餉。縱令兵勇沿途搶掠情事。著革職拿問等因。仰見朝廷明罰敕法之至意。然以臣愚見。與致罰於事後。而所誤已多。不如決機於臨事。而挽回尙易。查古者有行軍司馬。得於軍前戮人。應請特旨簡派近臣中有膽略風骨者。爲監軍御史。予以親騎百人。馳赴前敵。臨陣觀戰。倘有退縮不

前者卽行處斬。並稽察營官匿餉。兵勇淫掠諸弊。如查明屬實。卽以軍法從事。如是則人人知奮。萬衆一心。以之摧敵。何敵不克。

一利轉運。軍行以糧食爲先。軍火爲重。聞敵人於數年前。已豫備乾糧肉脯。積存廣島。足敷數十萬人之用。此次與韓人立約。重令接濟食物。我自有行營以來。未聞後路設立糧臺。我軍前在平壤。每日只以清鹽和飯。並乾菜而無之。後退駐義州。韓民不肯餽賣。無所得食。故仍棄而不守。此轉輸之不利也。大東溝海戰。我定遠鎮遠二艦力戰三時之久。大礮二尊。不及二百響。而開花彈已罄。次等礮二百數十響。而亦罄。所存者實心鋼彈數十。遂不能乘勝窮追。此軍火之不繼也。查鳳凰城去京師一千九百八十里。去奉天四百四十里。遼陽州當其中。其地距牛莊不過百餘里。亦便海運。若於此處設立後路糧臺。則前敵各軍。不致有饑潰之慮。其近內則於錦州山海關二處各設一局。以利轉輸。關以內既有鐵路直達天津。應請飭下津滬製造局。趕造各種彈藥。發運接濟。則軍火不憂缺乏。抑臣更有慮者。海運之利。宜於承平。一有海氛。深虞梗阻。蘆溝橋至漢口鐵路。議開而未及辦。已作緩圖。今爲目前急計。惟有就連河最淺之處。先造濟甯至臨清一段。其地長不過三百里。以每里五千金計之。不過百五十萬。以每日六里計之。不過五十日可成。祇就原有大道。略加脩築。亦無遷改廬墓之舉。惟輪車過黃河時。應仿西人用輪船載車并渡之法。此路一成。則明年百萬之漕。均可由此轉運。應請飭下北洋大臣籌款。官督商辦。許以保息。卽向鄂省鐵政局定造鐵軌。或暫向外洋購辦輪車。應用各鐵器。尅期集事。將來養路之費。不憂無出。而於倉

庚正供甚有裨益。是亦利運之要圖也。

一固根本。現在畿輔大兵雲集。蓋以京師爲首善之區。不得不厚集兵力以防侵突。聞北塘大沽。防務已甚周密。封凍在邇。年內應可無虞。惟山海關一帶。岸峻水深。隨處可以登陸。故臨榆撫甯樂亭諸處。均爲衝要。現在各軍防守。諒已不少。然關外尚有甯遠至平泉一路。可透入喜峯口馬蘭峪諸處。內犯薊州。則京師勢將戒嚴。竊謂京都袤廣四十餘里。地面遼闊。萬一敵氛逼近。勢難攔城自守。查西國自有礮火以來。所有城垣。毀棄不守。所以德都柏林。於去城二十里之士邦道。設有礮臺以拒要路。法都巴黎。於近京十里。築不連礮堡數十。以資守衛。其明證也。今爲根本重地。計似宜於近郊要路。多築礮臺。分布陸路小礮。屯兵扼守。又通州爲倉庾積糧食所關。亦宜於近城路口。築臺置礮。不徒保守廩廩。亦足以屏蔽畿東。應請宸謨獨斷。飭下王大臣札委幹員。分路考察。何處可以築臺扼要。撥勇興辦。一面電飭出使大臣。多購克虜伯八九生的至十二生的之快放礮。哈乞開司五管之連珠礮。交商妥運。不過兩月即可來華。所有臺礮價值。卽於息借洋款項下開支。則神京之固。鞏若金湯矣。

上唐中丞書

仁和高爾伊子衡

敦請緩行。未蒙采納。退而竊思。終非良策。愚昧之見。不能緘默。敢重告于執事。臺灣未自主之前。公奉命內渡。辭義嚴整。無可訾議。今自主矣。荼毒生靈。且以萬計。我公僅以身免。何以俯答羣生。其不可者一。南洋開公非常之舉。爲國吐氣。備軍火鉅萬以濟急需。文武員弁。聞公言與臺灣始終。感慕忠義。效死勿去。



今公先去以爲民望。既無以答南洋。又無以答僚屬。其不可者二。臺灣糧餉軍械。萃于臺北。臺南賴此轉運。棄而不守。齎爲敵用。臺南孤立。不啻以臺北之資攻臺南也。又何以答劉軍門。其不可者三。有三不可。公奈何勿思。一舉不慎。悔無及矣。爾伊昨晚自獅球嶺奉調回省。基隆雖失。獅球八都尙無恙也。今早黃義德馳歸。謂獅球八都盡遭蹂躪。旦夕之間。可至淡水。該弁畏葸退縮。語未可信。卽度獅球我燬。鐵橋尙可扼守。公或挾輜重退保新竹。爾伊與俞主事臺北府縣死守於此。萬一失守。公進臺中。臺中告危。再進臺南。節節與拒。支持數月。各國發電若至。允爲保護。重危立解。否則同歸于盡。亦義無可辭。此上策也。若扁舟渡臺南。糾集燼餘。再圖恢復。而糧餉無多。軍火無多。由水程進。旣乏輪舶。陸程進。大甲溪又險不可越。非秋盡不得渡。不過守臺南片隅。以拒全敵耳。此次策也。若遍告紳耆。當時朝命割臺。爾等挽留內渡。改稱自主。死力拒倭。忠義勃然。今前敵糜爛。被陷之民轉爲賊接濟。爲賊嚮導。良莠不齊。亦可概見。余將遵旨內渡。爾等願從倭者。勉事後人。不願從倭。其擇賢推立。毋以我爲念。倘紳民挽留甚堅。必得死力相助。不見挽留。則民心去矣。乃移文倭軍。告以初立總統。出于民請。今民厭戰。余何必多殺無辜。與汝爭此朝廷棄土。各卸甲兵。從事交割。如此去臺賢於無名。然已下策矣。至於徵服潛行。爾伊實不知策之所在。三貂嶺土豪簡天瑞。鄭天喜。招爲內應。擊退倭軍。奉允賞給六萬金。約十四日起兵。公曷暫留三日。觀此一舉。重賞之下。必有勇夫。以地理人情審度。當有奇效也。公其察之。

上劉軍門永福書

高爾伊



卸委基隆前敵營務處候選同知高爾伊上書軍門麾下竊爾伊自去歲元旦至臺。蒙唐撫軍委辦全臺息借事宜。三月蒙楊提軍加委前敵營務稽察。五月蒙撫軍改委基隆前敵營務處。而任事三日。大事已去。尋隨撫軍內渡。意欲仗策麾下。圖維再舉。伏思在臺五月。謹貢寸楮。未仰尊顏。冒昧晉謁。無乃突如。是以欲行又止。而企慕之忱。未嘗一日去諸懷也。近聞節制之師。屢殲小醜。臺南千里。安堵如恆。海內歡呼。引領東向。因唐君天燮謁鈴轅之便。謹將管窺所見。上達清聽。一則朝廷既與倭和。軍門爲國家鎮臣。尙稱戈拒敵。是謂逆命。名不正則事不成。宜稱民舉總統。敗則無累於朝廷。勝則爲國家藩服。則名正矣。一則唐撫軍任總統時。遍告各國。求爲外援。五月十四日。俄廷賀函已至。各國亦將致賀。聞總統出奔。乃止。使各國皆允臺灣爲自主。倭人稱兵不已。必有勒和之舉。功敗垂成。曷勝浩歎。軍門宜於滬上聘習洋文之員。電致各國。告以前總統出奔。後總統猶任。請一律保護。以商務礦務酬其勞。各國久仰盛名。賀電必至。則外援固矣。一則臺灣僅三府耳。倭據有臺北。已得三分之一。臥榻之旁。豈容他人久睡。再俟數月。旅順威海之兵將撤。倭人併力進攻。軍門守臺南片隅。烏能久拒。宜及今恢復臺北。使未至根蒂深固。鋤而去之一。則臺灣軍火萃於臺北。而臺南所存無幾。今內無製造。外無接濟。軍火有時而盡。爲之奈何。宜力請南洋設法接濟。爾伊在臺以前。敵營務稽察。辦事兩月。以營務處督戰三日。身列槍林。礮雨之中。幸未受害。而虎口餘生。壯心未已。茲將往江甯謁張制軍。爾伊此行非爲他。實爲臺灣。仰見軍門孤軍久駐。忠義勃然。草野編氓。尙思攘臂相助。封疆大吏。未聞設法救援。意欲請南洋助餉若干。助軍火若干。由泉州

潛渡進萬華口。小艇駛風一宵可達。秦庭之請。不識南洋。獲見允否。果獲見允。尋當隸入麾下。從征臺北。事濟軍門。獲蓋世之功。爾伊亦獲附驥尾。不濟軍門爲張巡。爾伊亦願爲許遠也。倘不見允。爾伊亦何難挺身東渡。分軍門憂。竊思如伊之才。車載斗量。何可勝數。手無尺寸。浪言赴危。軍門縱不見責。人其謂我何。惟東望旌旗。指顧奏捷。爲扶餘勿爲田橫。心香遙祝而已。有三人不敢不爲軍門告。舉人李應辰。曾聯滬尾十八莊。莊五百人。精悍可恃。滬口有警。願當前敵。倭人自基隆進犯。未遂厥志。軍門由新竹進攻。可與犄角。三貂嶺土豪簡天瑞。鄭天喜。一呼而應者萬人。爾伊于五月初十日。曾約爲內應。驅倭入海。與犗六萬金。允十四日合力併擊。撫軍出奔。事遂不果。軍門由宜蘭進攻。可招爲爪牙也。倚裝草草。頓首上言。

上南皮張制軍書

高爾伊

門下晚學生高爾伊謹上書于太夫子鈞座。竊維難求者際遇。難得者物望。難一者事權。難遭者時會。我公以文學侍從之臣。出撫山右。非有曾胡再造之功。恪靖遐征之績。不數年間。迭任兼圻。湘鄂江淮百粵之邦。咸荷膏澤。而朝廷眷顧東南。方爲柱石之倚。枚卜盛典。翹首可待。際遇不可謂不隆矣。公初撫山右。視事之日。封摺上言。有不畋園山西一隅。蓄經營八表之志。至今士林傳爲美譚。公講求實學。陶育寒畯。興作製造。利益工商。庶政誕敷。百廢俱舉。是以節鉞所指。士大夫以及編氓之聞風嚮慕者。莫不仰企天人。願瞻顏色。方以宋之司馬君實。不啻過之。物望不可謂不崇矣。南洋兼轄七省。延袤數千里。東南半壁。經之營之。繫於我公一人。非若六部大臣。以長官六人。僅司一曹。又非若樞密譯署。執政者數人。展一策。

而周歲靡定。謀一事而議論紛歧。發言盈廷。折衷莫主。而南洋通飭所至。司道以下莫不奉令惟謹。可創可革。可行可止。朝廷既畀重權。亦未嘗疾持其後也。事權所屬。靡得旁貸。自倭人無端肇衅。侵我藩封。擾我陵寢。割我膏腴。索我鉅款。竊謂喪師失地。古亦有聞。割地求和。秦漢以來未之或覩。宋割河北三鎮。亦半就淪亡。非臺灣完善之區可比也。至中華致金繒於外夷。漢有匈奴。唐有突厥。回紇。宋有契丹女真。歲以爲常。所輸無幾。卽我朝開海禁之後。道光壬寅。償英煙款二千一百萬。咸豐庚申。償英法兵費各八百萬。光緒辛巳。償俄守伊犁費九百萬。虛布未有如今日二萬萬之多。凡有血氣者。莫不欲劍斬樓蘭。組繫單于。爲國家雪大恥。窮則變。變則通。古公事薰育。句踐事吳。未必非一大轉機也。時會所關。機不可失。我公遭明良之際遇。攬中外之物望。握事權而施行。乘時會而展布。漢室再造。鄧寇扶輿。唐運中頽。李陸夾鼎。行見方之古人。後先媲美矣。夫德意志乃日耳曼一小國耳。其相畢士馬克經營締造。三十年來敗丹敗奧。敗法。遂爲最強之國。與英德法相抗衡。以我中國之博大。執事之賢明。安見數載之後。不雄視海外哉。竊謂自倭人毀約之後。至重訂和議。鑄成大錯。其失有三。夫守城者以扼險要爲上。棄險要而不守。危坐孤城。閉門自困。是謂授人鎗而自操其刃。防海者以迎擊爲上。不能決戰於洪濤巨浪間。徒守口以待使彼來往裕如。我不得一日高枕而臥。是謂客處逸而主受其勞。倭人旣擊高陞。戰機決矣。倘集南北兵艘。命將出師。直達三島。倭人兵輪僅五十餘艘。我軍合北洋江浙閩粵計之。亦有四十餘艘。與之一決勝負。亦未知鹿死誰手。且倭島海口鱗接。與臺灣相似。彼亦自謀防海。自無暇出而謀我。何至坐使鴟張跋

慮。一至於此。是不得不歸咎於海軍之將帥也。其失一。倭人既渡鴨綠。所向輒破。所至輒殘。佔據旅順。失我天險。夫旅順與大沽煙台遙遙對峙。洵北洋之咽喉。然我據之則爲天險。倭據之則爲絕地。何則。旅順雖失。煙台大沽幸無恙也。倭未得煙台大沽。不能禁我輪船之出入。且旅順仰攻則險。自後攻之則坦蕩。大道絕無阻滯。我陸軍數十營。旣萃北平。更調集海軍夾而攻之。倭人其死亡自救之不暇。何致竄入煙台。再肆猖獗。乃諸艘匿影口內。不敢越雷池一步。洎劉公島被陷。北洋兵輪轉資敵用。經營十載。盡付東流。是不得不歸咎於媚敵之降將也。其失二。寇旣深入。我皇上惻焉憫焉。不忍生靈塗炭。遣使議和。倭人益詡詡自得。要挾無厭。薄海臣民無不痛心疾首。願效死於扶桑之島。使朝廷宣布九州。問以和戰之孰得孰失。竊謂忠義之士慷慨赴難者。當不翅幾千萬人矣。富者輸資。貧者輸力。乘其忿激。爲背城借一之舉。大挫之後。士有鬪志。然舟而濟。軍無還心。朝廷更以償款鉅資。聯結與國。與之掎角而進。謂叢爾三島。不指日淪亡也幾希。且倭人僅常備兵六萬有奇。豫備兵九萬有奇。後備兵十四萬有奇。常備死傷殆盡。守旅順遼東者皆豫備。國中守城者皆後備矣。橫斂暴征。民多怨望。度支僅至今歲四月屆期而爭戰不已。餉無可籌。行將內亂。此臺撫密遣探倭委員程承瀛目擊情形。非若道聽塗說之無稽也。使臣久居倭國。豈不聞此。乃爲挖肉之謀。以救燃眉之急。遂成千古恨事。是不得不歸咎於議和之上相也。其失三。今和議已成。三失遂定。不惟三失。且有五害。夫臺灣爲南洋門戶。門戶旣失。則南洋無所屏蔽。彼將屯糧於斯。屯兵於斯。無轉運之勞。無奔波之瘁。自臺至閩。至浙。僅一晝夜。至廣。至江。僅兩晝夜。一葦可航。不崇朝。

而至。我廣東口岸幾何。福建口岸幾何。浙江口岸幾何。由江蘇入長江。則其中之口岸又幾何。少有疏虞。彼卽蹈瑕抵隙而謀我。此撤藩籬之害。一也。國家財賦所入。歲不過八千萬左右。而經用浩繁。無事之秋。出入僅起相抵。一有軍務。河工。度支立匱。今借洋款洋磅。已不下五千餘萬。益以償款鉅資。無事且難於彌補。有事更難於措施。且威海倭兵。非款清之日。不肯退回。我北平陸軍。不得一日撤防。而海軍經巨創之後。善後無異重興。則經費又從何而出。借華款。誰肯集資以事敵。借洋磅。又欲我關稅作抵。則財賦已入他人之掌握。和一倭又一倭也。竊謂償款本息並舉。至期而款必未清。倭人將率其醜類。責我爽約。收我關稅。仍以兵戎相見。欲似壬寅之於庚申。庚申之於甲申。甲申之於今。有一二十年之安然無恙。不可得矣。此速兵禍之害。二也。各國之市。久有條約。今倭人壟斷獨登。有意肢削中國。查各國稅釐。素重於我。近年自行修約。互有增加。我子口半稅。乃值百抽二五。今允倭以值百抽二。彼重而又重。不爲病。我輕而又輕。固誰德也。洋貨入口。售與華人後。免其一切稅鈔。此各國久要求而不得者。今又允倭。倭之貨日見銷。卽我之稅日見絀也。洋商以機器進口。製造貨物。久有例禁。各國亦以中國之利權所在。小民之生計所在。不敢勉強。今又允倭製造貨物。僅交機器進口稅。貨物再運內地。概免稅課。倘他國援以爲請。何以應之。不允必以勢凌我。允之則我之商務立壞。民不聊生。彼日以富。我日以貧。此奪利權之害。三也。新立沙市重慶蘇杭四口岸。皆在內地。各國所未經通商者。既允駐紮領事。則所過之處。不必州縣護送。又運來貨物。可任意存寄。無庸輸稅。則通商者四處。而似通非通者。所過之處皆是也。自去秋海疆告警。內地

所獲倭姦當以百計。而倭攻澎湖臺易服事夷者皆我華人。爾伊身列前敵。曾親見之。浙之甯波。閩之漳泉。實繁有徒。而隸籍粵東者猶夥。是倭人未入內地。已散布間諜。伍我匪民。既入內地。其有不顯與我匪類爲伍也歟。倘一旦有事。聲氣相通。虛實洞悉。外合內應。若鄉人之履里巷焉。豈不岌岌乎殆哉。此藏姦宄之害四也。昔倭滅琉球。我不作存邢之舉。於是法剪越南。英并暹羅緬甸。今朝鮮又歸自主。二十年來。吾屬國盡矣。臺澎畀倭。說者以保畿輔爲重。不得已而遂割地之請。諸夷殷鑒於此。將率海軍一隊。擾我北洋。震我畿輔。英由印度而規西藏。再由香港而規粵東。法由越南而規滇桂。俄與我犬牙相錯。又欲規及新疆吉林黑龍江蒙古。吾將何以爲國乎。倭固吾讐。俄英亦非我親也。俄代集鉅資以償倭款。保無有深意存其間。朝廷又命赫德專假英款。保無以此啓英人覬覦之意。此招外患之害五也。嗟乎。三失疏於往。五害乘而來。處今日而欲善後。亦戛戛乎其難之矣。此賈長沙之所以痛哭流涕而長太息者也。雖然。天下無不可革之弊。無不可返之習。孔子曰。齊一變至於魯。魯一變至於道。董子曰。琴瑟不調。甚者必解而更張之。乃可鼓也。爲政不行。甚者必變而更化之。乃可理也。善後之策。亦在善變焉矣耳。倘或有變之名。無變之實。泄沓之風。今昔靡異。寒暄之間。十一縣殊。轉不若廢武備。棄險要。撤練軍。與民休息。寇至則斂金帛而事之。割膏腴而事之。率天下之臣民而事之。較賢於經營數十載。虛耗數千萬。仍歸於盡。仍不免割地償款也。如謂不能。則善後之策。其可緩一日乎哉。今之言時務者。亦浩若恆沙。勦說雷同。絕無卓識。一以泰西爲圭臬。而不知變通其法。甚者放誕其言。直欲如倭人之步武泰西。盡改其典禮制度。服色而

後可是亦妄人也。已茲不具論。論其言之可行者。謂當務之急。莫如練精兵。欲練精兵。必先節費用。開利源。節費用之道有二。曰撤綠營。裁驛政。開利源之道有四。曰加洋稅。興礦務。行制鈔。鑄銀錢。聞嘗竊思。綠營未嘗不可撤。驛政未嘗不可裁。要未若撤而不撤。裁而不裁之爲愈也。洋稅礦務。制鈔銀錢。未嘗不可加。可與可行可鑄也。要亦在善用其變也。請詳論之。考直省綠營兵額。六十六萬一千餘名。而東南少於西北。合七省計之。當四分之一。八旂駐防。尙不在內。夫駐防皆從龍之裔。聖恩高厚。界世食舊德。非臣下所敢議。綠營相沿日久。積習愈深。三三五五。零星散處。以演習爲具文。以防守爲餘事。一將弁之圍牧僕隸工匠。無不食兵餉以充。故虛額十之三。執役十之三。老弱十之二。其餘可以備行陣者。亦不過阿擁護衛。壯聲威而已。粵匪之亂。未聞有綠營出勦。其委靡不可用。已非朝夕。迨湘淮勇興。一洗陋習。而大難以平。救平之後。湘淮練軍徧天下。夫練軍固百戰之餘。然三十年來。又疲老不堪復用。昔捻匪熾時。曾文正已言湘勇多有暮氣。不如淮勇之方銳。卒用淮勇而收效。今又幾何時。而謂湘淮練軍尙可復用乎哉。昔趙惠致疑廉頗。光武間置馬援。伏讀聖祖仁皇帝之訓。亦謂老將氣衰不可恃。蓋惟少年未弁。希功懷賞。乃敢輕萬死以求一生。老將富貴已成。無復他願。欲令身坐礮眼。復如曩時。勢不可得。故非特兵不可用也。將亦不可用。然而牛雖瘠。加於豚上。金雖鈍。利於竹木。竊謂宜奏汰東南七省綠營。以東南七省練軍補之。統領營官。悉補將弁。綠營之兵。固有業可事。雖汰而不至流離失所。練軍爲衝鋒陷陣則不足。爲緝捕防守則有餘。一汰一補。豈非兩得。此綠營之撤而不撤。練軍之費可得而節矣。直省驛政。統於臬司。塘



汛舖兵。星羅棋布。國家歲需三百萬有奇。東南七省當居十之三。一站之中。有弁數員。有兵數十人。有馬數十匹。所司者僅朝廷之詔旨。臣工之章疏。各署之文移。關提照會而已。事雖重大。未嘗紛繁。而積弊叢生。時有曠誤。故近有軍務。復設文報局。以捷音信。事類重疊。查泰西郵政。創自德國。於城鄉市鎮商民聚集之區。徧設書報館。統以大員。派員分理。凡公牘私函。莫不傳遞。嗣後各國皆仿行之。頗握利權。前駐長崎領事余雲眉云。倭國自丁丑年起。郵政局總計歲收銀八十一萬三千餘元。除經費七十六萬八千餘元。尚餘四萬五千餘元。不數年間。已增至一百四十二萬四千餘元。此猶六七年前事。今更不知增幾何矣。竊謂東南七省。宜奏罷所有驛站。於城鄉市鎮廣設文報局。改名驛政。仍歸臬司統之。其法一如泰西郵政。蓋持一函而走。與持千百函而走。何以異。其費勿益。其利孔多。且塘汛員弁。即可充局員。舖兵即可充長夫。民間私函什物。爲之計里定價。泰西郵政不計遠近。本國僅取二分。他國僅取五分。我鮮輪船出口。不能行之外洋。僅行諸本境。取價不必過廉。然亦當較廉於信局。以廣招徠。所有信局。概令停止。蓋信局皆無本經紀。不過按期遞送。取資於人。雖停止不至虧折。願充司事者錄之。俾免失業。且情形較悉。可效奔走之役。各局月上往來清摺。以備稽查。至自某處者若干。遞至某處者若干。歲終合東南七省總計之。了然可數。行之甚易。察之甚易。獲利又甚易。夫泰西取之甚微。已有贏餘。我取之較厚。尙有折閱之虞乎。此驛政之裁而不裁。其費亦可得而節矣。洋藥入中國。每歲不下數千萬金。以光緒十九年計之。進口六萬七千九百十二箱。值銀三千一百六十九萬一千三百餘兩。內地所產之著者。四川之葵漿。浙江之



台漿雲南之雲土。福建之建土。其餘不勝枚舉。較洋藥當加四倍。計值當加三倍。既不能禁。不如因以爲利。查泰西進口釐稅。大都以二十四爲率。有徵不及十一者。亦有倍值而徵者。徵不及十一者。民生食用之物也。倍值而徵者。無益之物也。夫洋藥之爲物。非惟無益。且有大害。固可仿而行之。然洋藥爲印度出口大宗。英國之利源所在。故各國教士嘗謂鴉片煙流毒中國。違背公法。議立會禁止。上諸英之政府。終依違不決。蓋惟恐銷之不廣。利之不厚也。當稅釐併徵之第一年。入口洋藥之數。短至四千箱左右。赫德皇皇然條陳總署。請加土藥釐金。其心亦可見矣。今若議加稅則。洋藥之銷日塞。土藥之銷日廣。英國焉有不堅持力阻。以便己之私乎。竊謂宜於香港總匯之處。設一公司。凡洋藥進口。皆歸公司購買。稅釐如恆。商人來販者。倍其值。內地栽罌粟之區。飭州縣查明田畝。較種五穀者。倍徵錢漕。土藥至關卡。值百抽百。值千抽千。必使其值與洋藥如舊時之不甚懸殊。庶商人無所趨避。英人亦無所藉口。果因價昂而銷者日減。則數十年之流毒。一旦盡洗。豈不甚善。不減則每歲所征。當贏至數千萬。且流毒已深。非十載八載所能驟減。則逐年之利。已收至數百兆矣。此加洋稅之變策也。五金之產。天地自然之利。無處無之。管子曰。上有丹砂者。下有黃金。上有慈石者。下有銅銀。上有鉛者。下有銀。上有赭石者。下有鐵。蓋中古亦未嘗不講求礦務也。書地理志云。天下所產金銀鉛銅鐵。以嶺南一道爲獨饒。西人謂中國金銀礦之顯著者。直隸九處。山東二十處。山西二處。陝西四處。甘肅十三處。雲南廿三處。貴州二處。江西四處。安徽一處。浙江十一處。福建十處。湖北十三處。湖南十四處。四川三處。兩廣二十六處。其餘深密未見者。不知凡

幾而銅鐵煤礦更難枚舉。兩粵大山起伏之處，重岡疊嶺，俯拾卽是。非若他處之礦，鑛深數十尺始見苗者。蓋粵中沙土較薄，則易見。是以各國多有五金礦，比爲最精，美爲最盛，而俄獨罕見。土厚故也。至有明中葉，吞併烏拉嶺諸部，乃獲金礦三百餘年，拓地日廣，據有悉卑爾全境，阿爾泰山縱橫數千里，山重水複，處處有金。俄人呼爲金穴，設廠一千一百四十六所，每歲所入得淨金九十七萬九千二百餘兩。其地與兩粵相似，倘兩粵開辦，沙土較薄，見金較易。然我中國一鑑於明季之騷擾，再惑於風水之說，三病於商股之折閱。是以數十年來，見成效者僅漠河臺北之金，開平基隆之煤，雲南之銅，亦未能盡力採取。明季騷擾，肇自宦官夫人而知之矣。風水之說，有識者不惑也。商股折閱，半由於不得其人，半由於不得其法。不得其人，則侵吞虛冒，不一而足，不得其法，則雖有鉅資，亦付流水。故人人視爲畏途，遂無有過而問津者。竊謂宜照會各國領事，並札駐紮新嘉坡新舊金山領事，無論華洋商人，有集資開礦者，地方官爲之保護，設官爐廠爲之鎔鍊，除經費外，十稅其一。產主亦取其一。產主有阻撓者，繩之以法。有姦宄以風水相搖惑者，亦繩之以法。洋商趨利若鶩，應者必夥。出洋商民，厚擁鉅資，實繁有徒。習見開礦之利，故一鄉有行之者，必樂爲先導。當首從兩粵開辦，其功易見，其利必厚。既得功利，則內地富商，必有聞風興起者。或謂任洋商開取，則利權歸於他人，不如藏富於地，尚有徐圖之一日。不知我礦務豐盛，泰西垂涎已非朝夕。及時不取，恐如臺北之金沙、基隆之煤礦，已入他人之手。欲取不得矣。及時取之，以杜他人之覬覦。國家可收其稅課，小民亦可藉工資以博衣食。欲制金銀出口，更當鑄成金銀錢付之。蓋各國圖法他國。

之錢。概不得用。既不能用。則洋商欲持銀返國者。必載貨而往。出口之貨。亦可起色。若慮洋商進之易。退之難。爲之區域。指明數處。使不得於他處開辦。創者一。因者必百。一礦成。則百礦皆興。他日利權仍操諸我。而獲利正無窮矣。此與礦務之變策也。制鈔者。所以濟銀幣之困也。順治中。嘗製鈔十二萬。後因府庫充溢。停止。咸豐間。亦行寶鈔。民間得之者。不能取銀於庫。故發各省。又阻以不得解部款。僅於捐輸局參用之。各關稅。仍收銀兩。買鈔解庫。市僧以爲姦。輕重其價。故不久遂廢。外省行鈔。令時。惟福建爲最善。發銀若干萬。立官局以司出納。凡以鈔支錢。無折無扣。鈔遂通行。兵餉數十萬。皆不支銀。而領鈔。他款亦然。迨寇警。支銀者踵至不給。卽淘淘滋事。乃傾庫給發。說者恆持以爲戒。亦因噎廢食也已。設以索餉。刮庫。將廢庫藏之存積者乎。無是理也。夫制鈔。特患行之不廣耳。行之既廣。則直省無分疆域。不取於此。卽取於彼。一有警。未有不懷鈔而行者。嘗觀萬商雲集之區。貿易往還。恆持片紙。以抵鉅萬。今匯豐之票。人皆信之。與現銀無異。而公家行之轉多窒礙。豈公家之大。不及一行一鋪者乎。無他。行之不堅。持之不久。不足取信故也。竊謂宜製鈔三等。大鈔千元。中鈔百元。小鈔十元。其紙用機器織成。中夾以隱約文字圖記。一如匯豐刊鈔記。一爲南洋大臣鈔記。八爲七省藩司鈔記。南洋既蓋後。傳發七省藩司盡蓋之。然後發各府縣。責成殷實之錢莊。暨鹽當各商。加蓋圖記。轉用於市。期半載用盡。凡錢漕關稅。皆收鈔三成。各商具領付鈔。無庸繳銀。俟鈔用盡。乃繳銀於庫。七省之中。無分疆域。隨處可用。關稅錢漕收入之鈔。仍發諸商行之。一如前式。迨行三次。通都大邑。人皆習見。知可抵現銀之用。然後不至發商。凡職官養廉俸銀。

兵丁口糧一切支放之款皆用之。有持票易銀者。七省藩道府縣各庫悉照發。無折無扣。無紙筆之費。用久有昏爛者。卽解南洋焚燬。有誤用僞鈔者。不加罪根究。其作僞之人斬之。私減鈔價者治罪。告僞鈔者有賞。三載之後。當通行殆遍。蓋鈔數祇千元百元十元。爲數不巨。則民用便。紙用機器織成。則作僞者少。卽有作僞。其淵藪易搜。發商不先繳銀。則商人無賠墊之累。七省皆可用。則寄銀者省匯劃之費。準持鈔至庫取銀。則民間知公家無空紙易銀之意。行之既堅。持之既久。製鈔百萬。卽抵百萬之用。製鈔千萬。卽抵千萬之用矣。此行制鈔之變策也。外洋銀錢流入中國。向惟日斯巴尼亞所鑄者。咸豐年間始行。墨西哥銀圓。每元重七錢貳分。配九成足銀。餘攙以銅鉛。美國以九二成購下。販諸中國。均照足數。東南七省通行殆遍。統而計之。當不下數千百兆。則無形之虧耗。已不止數百兆矣。今又準倭人進口完稅。悉用倭錢。將來日本銀元亦必大盛。不自行鼓鑄。則無形之虧耗。伊於胡底。昔林文忠嘗製銀餅。輕重與洋錢等。市中以不能聽聲。不久卽折成銀塊。厥後無錫亦開鑪鼓鑄。造與洋錢無二。市商以板目之。擯棄不用。近廣東所鑄。始稍稍用之。然必貼水四五分。蓋民間知爲夷製。雖不足九成。亦信用之。知爲中國所製。雖足成亦不信用。其實市僧爲之高下也。竊謂宜於商務繁盛之區。設局數所。擇銀號之至大者。屬爲監造。錢式一如廣東。鑄明督造某官。監造某號。工長某某。工匠某某。某年某月某局造。造成發監造銀號勘估銀色。有不足九成者。責令督造以下皆賠償。凡關稅錢漕解部各款。均用之。奏請直省通行。以廣其用。價視紋銀。市商有高下其價者。治其罪。然後收取洋錢。悉爲鼓鑄。機器當購諸美國。其製最巧。由鎔化而鼓鑄。

而範圍而陶洗而印鑿。每日可成四五萬元。鑄成千萬。則機器之值。既人工煤炭皆有所出。鼓鑄三年。可使西北不復用銀兩。東南不復見洋錢於市。則利權皆操諸公家矣。此鑄銀錢之變策也。使節者既節。開者既開。國課所入。奚啻倍蓰。不數年間。償款亦清。練兵之資。可以無慮。然利非一日可收。兵非一日可緩。當先練精兵一萬。曾文正嘗云。欲精兵。惟汰兵。當時胡文忠數爲千古不易之論。蓋條多不殖。馬多害羣。兵在精不在多。古人先言之矣。故合東南七省。當練精兵七萬而止。創練之始。宜於窮鄉僻壤。隨帶醫士數人。開募。昔人謂城市之民多游蕩。鄉邑之民多樸實。水鄉之民多浮滑。山僻之民多犷悍。洵非虛語。今年十六以上。二十以下。報名入冊。使醫視之。氣體充實。精力強壯者。錄用。謂之下丁。練下丁之法。分一日爲兩程。早程識字。晚程辨器械。以一年爲期。不成者黜之。蓋兵不識字。必無謀略。無謀略則野戰。故識字當以五千爲率。兵不辨器械。必不知其機。不知其機。則用之不精。故當萃泰西各國所有槍礮各十具於營。使之撤卸。使之裝合。使之知其機粗利鈍。練既成。乃入次丁。練次丁之法。延洋教習教之。亦分一日爲兩程。早程習走隊列陣。施放進退起伏之事。晚程習舉重超距攀援跳躍之事。以一年爲期。不成者黜之。蓋走隊欲其步之齊。馳之疾也。列陣欲其知變化也。施放欲其準而速也。進退起伏。欲其知趨避而無參差也。舉重使之堅其足而勁其腕。超距使其登嶺不喘。攀援使其身之不墜。跳躍使其遇險可越。練既成。乃入上丁。上丁分守輪船礮臺守礮臺者。學繪圖。攬山川之形勢。守輪船者。學駛駕。測海線之淺深。舊藝時時習之。勿使生疏。兵之中有傑出者。卽爲什長。什長中有傑出者。卽爲哨官。數年之後。皆將才也。水陸

不宜分途。水師不能陸戰，則得勝未能起岸與爭。陸軍不能水戰，則水師失利，不能調陸軍以繼。且輪船所以防海，礮臺所以防陸。輪船有礮臺爲犄角，則勢壯。礮臺有輪船爲游弋，則勢固。故守礮臺之兵，一年後當調守輪船。守輪船之兵，一年後當調守礮臺。交相更代，以一其用。則水陸咸宜矣。輪船經費浩大，鐵甲非十餘萬磅不辦。木質亦須二十萬金，爲防護口岸計，宜先購蚊子魚雷各船，亦可以載巨礮，可以駛海面，吃水少，無擱淺之虞。圓轉靈可代浮礮臺之用，其價較廉。各口多備數艘，俟購添鐵甲，即可爲輔翼。是水師之要需也。礮臺宜節節相製，前者失利，後猶可守。石不如鐵，鐵不如土，以柔制剛，人共知也。當於山環水曲處，多築土礮臺，宜平不宜高，宜隱不宜顯。多樹竹木，數載成蔭，使遠望之不知礮位之所在。宜憑虛不宜用口門，蓋口門僅可禦一面，憑虛則四面八方無不可轟擊矣。無山處多築土壘，土壘之旁穴地爲壙，可以伏人，可以藏藥，以涉礮臺之窮，是陸軍之要需也。兵額宜視湘軍稍損益，十人爲隊，設隊長一，伙勇一，十隊爲哨，設哨官一，哨書一，五哨爲營，設營官一，文案一，支應一，其餘長夫親兵衛隊，一切勿置。蓋長夫不過供奔走，親兵衛隊不過壯觀瞻而已，且徒飽私囊，未必實用。故自營官至伙勇，僅六百十三人。教習稽察不在內，兵十人照一片，備存南洋，備存該管統領該縣地方官，旬日試演，演畢按片抽點。有頂替者，營官以下皆斥罷。比箕斗年貌較易驗，此防虛額之弊也。兵餉宜優給，平時不使飽暖，臨事安望得其死力。當給上丁七兩，次丁五兩，下丁三兩，半贍其家，半治其衣食，一切頭巾號衣皆支諸公家。營官以下薪水悉從豐厚，有剋扣兵餉者殺無赦。發餉給以鈔，俾取於庫，不受制於營官支應之手。此防侵

餉之弊也。慮兵以勞瘁致怠惰，使十日一休沐，擇於丁日爲之息，丁息丁之日，營官以下皆卸甲。慮兵之精銳易稍歇，使充上丁十年者，退爲守城之兵；守城之兵，補綠營。有急乃調用。充綠營十五年者，退補各署役隸。保甲巡丁之類，以終其身。故練軍無年踰三十者，綠營無年踰五十者，慮兵以家室致累，爲之制入選之後，不得歸娶。俟充上丁期滿，準補綠營，乃得歸娶。給餉三月，俾資婚費。創練之處，宜擇於東南七省適中之地，以浙江之舟山爲最善。夫舟山四達之國也，遠連香港，近接吳淞，爲閩浙保障。又逼近長江口外，得威重上將，建闢於斯，練成一營，卽調守各處口岸。泊口岸密布殆遍，一旦有事，呼應較靈。蓋臺灣旣亡，則七省之屏障已撤，以舟山爲重，則七省之關鍵猶存。是謂合七省之水師爲一軍，毋因循，毋苟且。毋蒙蔽，毋粉飾，得公居中調度之，豈非如血脈之貫通，如指臂之助効哉！至於開鐵路，興製造，亦當務之急，而製造宜制專科，使能製一礮者，入選；能製一槍者，亦入選。其價當使與外洋相勒，能出新意成一器者，列上等。惟輪船則經費較巨，非民間自能製造，宜擇聰穎子弟，至外洋船廠學習，學成旣充外洋工人三年，乃準歸授以官職，使充船廠委員。鐵路裨益尤多，於節省用開利源諸大端均有關係，而經費浩大，籌款不易，宜招南洋及新舊金山殷實華商，使歸開辦。畀世守其業，彼等耳濡目染，習見利益，必能成其事。二者更有專論，茲不贅述。我公遭明良之際遇，攬中外之物望，握事權而施行，乘時會而展布，及今不圖，後將何及？爾伊近卸臺灣前敵營務處內渡，聞公網羅才俊，一技之長，無不錄用，自問雖庸劣，尙非朽木之不可雕者，謹將斑見所及，上達清聽，不敢蹈策士之故轍。洋洋萬言，不歸實際，故略天下之大，就

南洋之可行者。言其梗概。願借階下尺寸之地。俾得軒眉靜氣。暢所欲言。榮幸萬分。又聞士之通謁門下者。匝月不得見。竊謂非吐握之旨。願公自茲以後。有通謁者。立行傳見。不當者。遣之。俾免稽留。以生疑慮。致有志之士。躑躅鈴幘。而欲進不進也。爾伊亦以師門舊誼。世荷甄陶。乃敢干冒尊嚴。不擇忌諱。以逞狂瞽。倘有不肖。進而教之。曷勝盼切。懸企之至。謹上。



叢書集成初編

于湖題襟集 三冊

中華書局出版發行

(北京王府井大街三十六號)

秦皇島市資料印刷廠印刷  
一九八五年北京新一版

開本：七八七乘一〇九二毫米三十二分之一  
統一書號：一七〇一八·一五一





